

ԵՐԱԿՐՈՆԵԱ ՄԱՍԿՐԱՆ

ՄԱՅՐ ԱՅՈՒՍ ՍՈՒՐԲ ԷԶՄԻԱԾՆԻ
ԿՐՈՆԱԿԱՆ, ՄԵԿՎՈՒԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ

Հայրապետական մատթանք Մայր Աթոռ Սուրբ Էջմիածնում Ամենայն Հայոց Հայրապետի օծման և գահակալության 26-րդ տարեդարձի առիթով




Նոյեմբերի 2-ին Մայր Աթոռ Սուրբ Էջմիածնում Ն. Ս. Օ. Ս. Տ. Գաբրիել Երկրորդ Ծայրագույն Պատրիարք և Ամենայն Հայոց Կաթողիկոսի գահակալության 26-րդ տարեդարձի առիթով Սուրբ Պատարագի ավարտին կատարվեց

Հայրապետական մատթանք: Ընկալյալ կարգի համաձայն՝ հավատացելոց երկրպագության համար դուրս էր բերվել նաև Սկևռայի սրբոց մասանց պահարանը: Սրբազան արարողությանը ներկա էին Հայ Եկեղեցու թեմակալ

առաջնորդներ, Գերագույն հոգևոր խորհրդի անդամներ, Մայր Աթոռ Սուրբ Էջմիածնի միաբաններ և ուխտավոր հայորդիներ: Պատարագիչն էր Մայր Աթոռի միաբան Գերաշնորհ Տ. Հայկազուն արքեպիսկոպոս Նաջարյանը:

Պատարագիչ Սրբազան իր քարոզում շնորհավորեց Հայոց Հոգևորականության օծման ու գահակալության տարեդարձի կապակցությամբ և անդրադարձավ Վեհափառ Հայրապետի հոգևոր, մշակութային, կրթական ու եկեղեցաշեն գործունեությանը ու մեծաթիվ ձեռքբերումներին՝ մաղթելով անսասան հովվապետություն՝ ի պայծառություն Հայաստանյայց Առաքելական Սուրբ Եկեղեցու, ի մխիթարություն բարեպաշտ ժողովրդի և ի զորացումն հայրենիքի: Այնուհետև Ամենայն Հայոց Հայրապետի օծման և գահակալության 26-րդ տարեդարձի առիթով իջման Սուրբ Սեղանի առջև կատարվեց Հայրապետական մատթանք՝ համդիսապետությամբ Մայր Աթոռի Արտաքին հարաբերությունների և արարողակարգի բաժնի տնօրեն Գերաշնորհ Տ. Նաթան արքեպիսկոպոս Հոգևորականի համար: Ներկաներն աղոթք բարձրաց-



րին առ Աստված՝ Ամենայն Հայոց Հայրապետության, Մայր Աթոռ Սուրբ Էջմիածնի անսասանության ու պայծառության, ինչպես նաև Նորին Սրբության քաջառողջության, կենաց արևշատության և բազմամյա գահակալության համար:

Ավարտվեց Գերագույն հոգևոր խորհրդի ժողովը

Նոյեմբերի 4-7-ը Մայր Աթոռ Սուրբ Էջմիածնում, Ն. Ս. Օ. Ս. Տ. Գաբրիել Երկրորդ Ծայրագույն Պատրիարք և Ամենայն Հայոց Կաթողիկոսի նախագահությամբ, տեղի ունեցավ Գերագույն հոգևոր խորհրդի ժողովը: Ժողովի սկզբում ԳԳԽ անդամներն աղոթեցին Մայր Աթոռի միաբան ճորտ հանգուցյալ Տ. Գիսակ արքեպիսկոպոս Սուրբադրամի հոգու հանգստության համար:

Հաջորդում փորձագետ Արա Ղազարյանը, փաստաբաններ Արամ Վարդևանյանը, Հովհաննես Խուրդյանը և ի. գ. թ. Արման Թաթոյանը: Գերագույն հոգևոր խորհուրդը խստորեն դատապարտեց եկեղեցու և եկեղեցականների իրավունքների նկատմամբ իրականացվող բացահայտ ապօրինի ոտնձգություններն ու ճնշումները, ինչպես նաև հակաեկեղեցական հռետորաբանությամբ ատելության խոսքի ու անհանդուրժողականության տարածումը՝ ընդգծելով, որ մեծ երևույթները խաթարում են ինչպես խղճի ու խոսքի ազատության սկզբունքը, այնպես էլ հանրային համերաշխությունը: Արձանագրվեց նաև, որ եկեղեցականներին առաջադրված մեղադրանքներն ու խափանման միջոցները հիմնված են ոչ իրավաչափ փաստերի վրա և հակասում են արդար դատաբանության իրավունքի և անձի ազատության սահմանափակման միջազգային չափանիշներին:



Խիստերը վարեց Մայր Աթոռի դիվանապետ Տ. Արշակ արքեպիսկոպոս Խաչատրյանը: Տ. Միքայել արք. Աջապահյանի, Տ. Բագրատ արք. Գալստայանի, Տ. Մկրտիչ եպս. Պողոսյանի, Տ. Գաբրիել քնն. Արսենյանի, ազգային բարերար Սամվել Կարապետյանի և ապօրինաբար ազատագրված մյուս հայորդիների նկատմամբ նախաձեռնված քրեական վարույթների, իրականացված դատավարական գործողությունների, կայացված դատավճռի, դրանց իրավական անհիմն և խտրական բնույթի, միջազգային հարթակներում եկեղեցու ու եկեղեցականների իրավունքների պաշտպանության, ազատ խոսքի և այլախոսության նկատմամբ անհանդուրժողականության ու տեղեկատվական դաշտում եկեղեցուն և եկեղեցականներին թիրախավորելու հաճախացող դեպքերի մասին զեկույցներով հանդես եկան ի. գ. թ. Արա Զոհրաբյանը, իրավաբան, մի-

ջազգային փորձագետ Արա Ղազարյանը, փաստաբաններ Արամ Վարդևանյանը, Հովհաննես Խուրդյանը և ի. գ. թ. Արման Թաթոյանը: Գերագույն հոգևոր խորհուրդը խստորեն դատապարտեց եկեղեցու և եկեղեցականների իրավունքների նկատմամբ իրականացվող բացահայտ ապօրինի ոտնձգություններն ու ճնշումները, ինչպես նաև հակաեկեղեցական հռետորաբանությամբ ատելության խոսքի ու անհանդուրժողականության տարածումը՝ ընդգծելով, որ մեծ երևույթները խաթարում են ինչպես խղճի ու խոսքի ազատության սկզբունքը, այնպես էլ հանրային համերաշխությունը: Արձանագրվեց նաև, որ եկեղեցականներին առաջադրված մեղադրանքներն ու խափանման միջոցները հիմնված են ոչ իրավաչափ փաստերի վրա և հակասում են արդար դատաբանության իրավունքի և անձի ազատության սահմանափակման միջազգային չափանիշներին:

ված հոգևորականներին ու քաղաքացիական անձանց: Անհրաժեշտ նկատվեցին նաև Հովհաննես Խուրդյանի նկատմամբ Մայր Աթոռի իրավունքների և ծիսաարարողական կյանքի վերականգնմանը, հավատացյալների հոգևոր-կանոնական կյանքի պաշտպանությանն ու եկեղեցականների բնականոն ծառայությանն ապահովմանն ուղղված քայլերը: Բաքվում պահվող զինվորական և քաղաքացիական անձանց նկատմամբ իրականացվող դատական գործընթացների, արցախահայերի իրավունքների պաշտպանության մասին զեկույցեց իրավաբան Արա Ղազարյանը: Ներկայացվեցին Աղրբեջանի կողմից մարդու իրավունքների խախտման աղաղակող դեպքերը, ընդգծվեց, որ իրականացվող, այսպես կոչված, դատավարությունները որևէ կապ չունեն արդարադատության հետ և հակասում են միջազգային մարդասիրական իրավունքի հիմնարար դրույթներին: Բանախոսը կարևորեց ինչպես եկեղեցու և միջազգային կազ-

մակերպությունների ներգրավվածությունը, այնպես էլ Սարգու իրավունքների եվրոպական դատարանի և ՄԱԿ-ի իրավապաշտպան մարմինների միջոցով գերիների ազատ արձակմանն ուղղված իրավական քայլերի իրականացումը: Գերագույն հոգևոր խորհուրդը ընդգծեց գերիների հարցի նկատմամբ շարունակական ուշադրության և համակարգված քայլերի անհրաժեշտությունը: Վերահաստատվեց եկեղեցու պատրաստակամությունը՝ շարունակելու ջանքերը Քույր եկեղեցիների ու միջազգային կրոնական կառույցների հետ համագործակցությամբ նպաստելու գերիների վերադարձին և մարդու իրավունքների պաշտպանությանն օրինական մեխանիզմների կիրառմանը: Արցախի հոգևոր-մշակութային ժառանգության նկատմամբ Աղրբեջանի ոտնձգությունների մասին զեկույցեց ԳԳԽ անդամ, ի. գ. ղ. Գևորգ Դանիելյանը՝ ներկայացնելով փաստեր, որոնք վկայում են

Աղրբեջանի կողմից իրականացվող համակարգված քաղաքականության մասին՝ միտված հայկական պատմամշակութային արժեքների ոչնչացմանը և յուրացմանը: Նշվեց, որ Աղրբեջանական իշխանության կողմից հովանավորվող պատմական գեղծարարության նպատակն է ջնջել տարածաշրջանի հայկական ինքնության հետքերը և փորձել օրինականացնել իրենց հավակնությունները հայկական ժառանգության նկատմամբ: ԳԳԽ-ն կարևորեց միջազգային ամենալայն շրջանակների աջակցության ապահովումը և մասնավորաբար Արցախի հոգևոր-մշակութային ժառանգության պահպանությանն ուղղությամբ եկեղեցու կողմից իրականացվող աշխատանքների առավել ընդլայնումը: Պ. գ. թ., դոցենտ Միքայել Մալխասյանը իր զեկույցում անդրադարձավ հանրակրթական ծրագրերում և Հայոց պատմության դասագրքերում տեղ գտած մտահոգիչ դրույթներին: ➔ էջ 2

Ավարտվեց Գերագույն հոգևոր խորհրդի ժողովը

← էջ 1

Բանախոսը ներկայացրեց օրինակներ, որոնք ցույց են տալիս, թե ինչպես են աղ- ճատվում Հայոց պատմության տարբեր փաստերը և խեղաթյուրվում իրադար- ձությունները՝ նսեմացնելով պատմական դեմքերի ու դեպքերի, եկեղեցական և պե- տական գործիչների պատմական դերը: Գերագույն հոգևոր խորհուրդը խիստ մտա-

հոգությամբ նկատեց, որ մեծ մասով մոտեցում- ները վտանգում են սերունդների ազգային ինքնության և պատմական հիշողության շա- րունակականությունը՝ կարևորելով ազգա- յին խորհրդանշանների արժեքները և դրանց համոզիչ հարգանքի ու պատշաճ վերաբեր- մունքի ձևավորման անհրաժեշտությունը, մաս ընդգծելով եկեղեցու առաքելությունը ժողովրդի ազգային ինքնության, պատմա-

կան հիշողության և հոգևոր արժեքների պահպանման գործում:

ԳՀԽ-ն քննարկեց և որոշեց Սուրբ Գրի- գոր Լուսավորիչ Հայրապետի վախճանման 1700-ամյակին նվիրված հոգևոր, մշակու- թային միջոցառումների կազմակերպման և Կոմիտաս վարդապետի սրբադասման հարցի քննության նպատակով ձևավորել հանձնախմբեր:

Քառօրյա ժողովի ընթացքում քննարկ- վեցին նաև եկեղեցու հովվական կյանքին, կարգապահական ու իրավական խնդիրնե- րին և եկեղեցու առաքելության արդյունա- վորմանն առնչվող հարցեր:

Ժողովն ամփոփվեց Ամենայն Հայոց Կաթողիկոսի օրհնության և գնահատանքի խոսքով:

Ամենայն Հայոց Կաթողիկոսն ընդունեց Արգենտինայի Հանրապետության օրենսդիր մարմնի ներկայացուցիչներին

Ն. Ս. Օ. Տ. Տ. Գարեգին Երկրորդ Ծայրա- գույն Պատրիարք և Ամենայն Հայոց Կաթո- ղիկոսը նոյեմբերի 4-ին Մայր Աթոռ Սուրբ Էջմիածնում ընդունեց Արգենտինայի Հան- րապետության օրենսդիր մարմնի ներկայա- ցուցիչներին:

Հանդիպմանը սեմատոր Խուան Կառլոս Ռոմերոն Նորին Սրբությանը տեղեկացրեց, որ պատվիրակությունն այցելել է Հայաս- տան՝ զորացնելու հայ-արգենտինական կապերը, ինչպես նաև ծանոթանալու հայ- կական հոգևոր, մշակութային ժառանգու- թյանը, Հայ եկեղեցու պատմությանն ու գոր- ծունեությանը:

Նորին Սրբությունը, իր օրհնությունը բե- րելով ներկաներին, անդրադարձավ Մայր Աթոռ Սուրբ Էջմիածնի՝ հայ ժողովրդի կյան- քում կարևոր դերակատարությանը՝ հոգևոր,

մշակութային արժեքների, ազգային ինքնու- թյան կերտման և ազգապահպան առաքե- լությանը: Խոսելով երկու երկրների սերտ հա- րաբերությունների մասին՝ Ամենայն Հայոց Կաթողիկոսը գոհունակությամբ ընդգծեց, որ դժվարին իրավիճակներում՝ հատկապես արցախյան պատերազմի ընթացքում, Ար- գենտինան մշտապես զորակից է եղել հայ ժողովրդին: Հայոց Հայրապետը գնահա- տանքով անդրադարձավ նաև հայ համայն- քի նկատմամբ Արգենտինայի իշխանություն- ների հոգածու վերաբերմունքին, ինչպես և արգենտինահայերի կարևոր ներդրմանը երկրի զարգացման գործում:

Վերջում Նորին Սրբությունը բարի ար- քունքներ մաղթեց պատվիրակության առա- քելությանը՝ ի շահ երկու երկրների և ժողո- վուրդների բարօրության:



Ֆրիտյոֆ Նանսենին նվիրված միջազգային գիտաժողովի մասնակիցներն այցելեցին Սուրբ Էջմիածին

Նոյեմբերի 5-ին Մայր Աթոռի Արտաքին հարաբերությունների և արարողակարգի բաժ- նի տնօրեն Գերաշնորհ Տ. Նաթան արքեպիս- կոպոս Հովհաննիսյանը Մայր Աթոռում ընդունեց «100 տարի անց. Ֆրի- տյոֆ Նանսենի ոտնա- հետքերով» միջազգային գիտաժողովի մասնա- կիցներին՝ նվիրված



Ֆ. Նանսենի և նրա հանձնախմբի՝ Հայաս- տան այցելության 100-ամյակին:

Երևանի՝ Ֆ. Նանսենի թանգարանի տնօրեն տիար Ժորա Հակոբյանը, ներկա- յացնելով հյուրերին, Սրբազան Հորը տե- ղելություններ փոխանցեց գիտաժողովի աշխատանքների և արձանագրված ար- քունքների մասին:

Նաթան արքեպիսկոպոսը ողջունեց գիտաժողովի անցկացման նախաձեռ- նությունը՝ ներկաներին փոխանցելով Ն. Ս. Օ. Տ. Գարեգին Երկրորդ Ծայրագույն Պատրիարք և Ամենայն Հայոց Կաթողիկոսի հայրապետական օրհնությունն ու բարեմաղ- թանքները:

Անդրադառնալով հայ ժողովրդի մեծ բա- րեկամ Ֆրիտյոֆ Նանսենի մարդասիրական

առաքելությանը՝ Սրբազան Հայրն ընդգծեց վերջինիս անուրանալի ավանդը ցեղասպա- նությունից փրկված հայ փախստականնե- րին և որբացած երեխաներին ցուցաբերած խնամքի ու նրանց վերաբնակեցման գոր- ծում: Այս առնչությամբ Նաթան Սրբազանը ցավով արձանագրեց, որ Ֆ. Նանսենից հա- րյուր տարի անց պատմությունը կրկնվեց. արցախահայությունը բռնի տեղահանվեց ու հայրենազրկվեց: Նաթան արքեպիսկո- պոսը նշեց, որ այս իրականության հանդի- ման Նանսենի ոգին՝ իբրև համամարդկային խղճի ձայն և մարդասիրության ու արդարու- թյան խորհրդանիշ, մեր ժամանակների հա- մար բարոյական ուղեցույց է՝ հաստատուն մնալու սիրո, կարեկցանքի և ճշմարտության ճանապարհին:

Ամենայն Հայոց Կաթողիկոսը մեկնեց Հնդկաստան

Ն. Ս. Օ. Տ. Տ. Գարեգին Երկրորդ Ամե- նայն Հայոց Կաթողիկոսը նոյեմբերի 8-ին Հայրապետական այցով մեկնեց Հնդկաս- տան, ուր հանդիպումներ կունենա Կալ- կաթայի Սուրբ Նազարեթ եկեղեցու հո- գաբարձուների, Հայոց Մարդասիրական ճեմարանի տնօրենության և ուսուցչա- կան կազմի հետ ճեմարանի գործունեու-

թյանն առնչվող հարցերի շուրջ: Նորին Սրբությանն ուղեկցում են Մայր Աթոռի միաբան Գերաշնորհ Տ. Հայկազուն ար- քեպիսկոպոս Նազարյանը, Արցախի թե- մի առաջնորդ Գերաշնորհ Տ. Վրթանես եպիսկոպոս Աբրահամյանը, Վեհափառ Հայրապետի հանձնակատար Հոգեշնորհ Տ. Գրիգոր արքեպ Միմասյանը:

Կարգալույծ է հռչակվել Տ. Տարոն քահանա Հունանյանը

Նոյեմբերի 6-ին Ն. Ս. Օ. Տ. Տ. Գարեգին Երկրորդ Ծայրագույն Պատրիարք և Ամե- նայն Հայոց Կաթողիկոսի Հայրապետական տնօրինությամբ ստորև ներկայացված հիմ- նավորումներով կարգալույծ է հռչակվել Տա- վուշի թեմի հոգևոր սպասավոր Տ. Տարոն քահանա Հունանյանը:

Տնօրենության համար հիմք են ծառայել Տավուշի թեմի առաջնորդական տեղապա- հի զեկուցագիրը և Հայաստանյայց Առաքե- լական Սուրբ Եկեղեցու Մայր Աթոռ Սուրբ Էջմիածնի Պարզկենտրոնի շնորհման և կար- գապահական հարցերի հանձնախմբի եզ- րակացությունը, որով վերջինս՝

ա) Ինքնակամ լքել է իր ծառայության վա- յրը 2024 թվականի մայիս ամսին,

բ) Ամենայն է Տավուշի թեմի առաջնորդա- կան տեղապահի հորդորներն ու հրահանգնե- րը և հարատել կարգազանց ընթացքի մեջ,

գ) Մասնակցել է կարգազուրկ հռչակված Ստեփան Ասատրյանի կազմակերպած հա- կականոնական արարողությանը՝ մեղսակից դառնալով կարգալուծվածին,

դ) Հրապարակային ելույթներով ու հայ- տարարություններով վարկաբեկել է Հա- յաստանյայց Առաքելական Սուրբ Եկեղեցին և ծառայակից եկեղեցականներին,

ե) Անարգալից վարքագիծ է դրսևորել եկեղեցական բարձրագույն իշխանու- թյան նկատմամբ և դրժել հնազանդության ուխտը:

Կարգալույծ է եկեղեցականն այսուհետ կդասվի աշխարհականների շարքին՝ Վար- դան Հունանյան ավագանի անունով:

Լրատվական նյութերը՝ Մայր Աթոռ Սուրբ Էջմիածնի տեղեկատվական համակարգի

Մայր Տաճարի զանգակատան ներքո ամփոփված երկու հայրապետները Ալեքսանդր Բ Բյուզանդացու մահվան 270-րդ տարելիցի առիթով

Մայր Տաճարի զանգակատան ներքո ամ- փոփված են երկու Հայրապետներ, և եր- կուան էլ կրում են Ալեքսանդր անունը. Ալեք- սանդր Ա Ջուղայեցին թաղված է գլխավոր մուտքի հյուսիսային կողմում, իսկ Ալեքսանդր Բ Բյուզանդացին՝ հարավային:

Մայր Տաճարի զանգակատան շինարա- րական աշխատանքներն սկսվել են Փի- լիպպոս Ա Աղբակեցի Կաթողիկոսի հայրա- պետության շրջանում՝ 1654 թ., սակայն 63 տարեկանում՝ 1655 թ. մարտի 25-ին, Հայ- րապետն անսպասելիորեն վախճանվում է՝ տաճարի միայն առաջին հարկի ներքին կա- մերը: Հարկ է նշել, որ զանգակատան կա- ռուցման աշխատանքները խոչընդոտում էր Երևանի Մահմուդ Դուլի խանը, որն ուներ քրիստոնյաների նկատմամբ ընդգծված ատելություն: Սակայն Փիլիպպոս Կաթողի- կոսը, առանց ունենալու խանի համաձայ- նությունը, նախաձեռնում է շինարարական աշխատանքներ:

Փիլիպպոս Կաթողիկոսի մահվանից հե- տո Մայր Աթոռի ողջ միաբանությունը ցան- կանում էր նրա մարմինն ամփոփել «ի դրան Սրբոյ Էջմիածնի, ի մեջ իւր շինեալ զան- գակատանն», բայց խանը Կաթողիկոսի մահվանից հետո էլ շարունակեց հակառա- կությունը, քանի որ առանց իր համաձայ- նության էր նախաձեռնել շինարարական աշխատանքները (Մաղաթիա արք. Օրմա- նեան, Ազգապատում, հտ. Բ, Ս. Էջմիածին, 2001, սիւնակ 2487): Մահվանից վեց օր անց՝ մարտի 31-ին, որևէ կերպ չկարողանալով համաձայնություն ձեռք բերել՝ միաբաննե- րը վճռեցին Վեհափառի մարմինը մեծա- շուք թափորով փոխադրել Սուրբ Հռիփսիմե վանք՝ այնտեղ ամփոփելով այն...

Ալեքսանդր Ա Ջուղայեցին Ամենայն Հայոց Կաթողիկոս է ընտրվել 1706 թ. սեպտեմբե- րին՝ հաջորդելով Նահապետ Ա Եդեսացի Կաթողիկոսին, որի վախճանվելուց հետո Հայոց հայրապետական գահը թափուր էր

մնացել շուրջ մեկ տարի: Նորընտիր հայ- րապետի կաթողիկոսական օծումը տեղի է ունեցել ավելի ուշ՝ նույն թվականի դեկտեմ- բերի յոթին:

Ալեքսանդր Ա Կաթողիկոսի մասին տեղե- կությունները խիստ սակավ են: Ծնվել է Նոր Ջուղայում, կրթությունը ևս ստացել է այն- տեղ՝ աշակերտելով Դավիթ Ջուղայեցուն: Եղել է Նոր Ջուղայի Սուրբ Ամենափրկիչ վանքի միաբան, վանահայր, պարսկահայոց առաջնորդ, ինչպես նաև դասավանդել է Նոր Ջուղայի վանական դպրոցում:

Սիմեոն Ա Երևանցի Հայրապետը դրվա- տանքի խոսքերով է բնութագրում Ալեք- սանդր Ա-ին. «Սա էր այր վանական և տե- ղեակ Աստուածաշունչ գրող, համճարեղ և շինարար, որ զբաղում հնացեալ շինուածս Սրբոյ Աթոռոյս նորոգեաց» (Սիմեոն Երևան- ցի, Ջամբը, Երևան, 2022, էջ 71): Ալեքսանդր Ա Կաթողիկոսի օրոք Մայրավանքում շինա- րարական աշխատանքներ են կատարվել,

կառուցվել է Մայր Աթոռի ձմեռային սեղա- նատունը: Տարբեր միջոցներով՝ եկեղեցա- կան զարդերով, հարակից կահավորանքով, ինչպես նաև անասուններով, համալրվել է Մայր Աթոռի ունեցվածքը: Մայր Աթոռի բուն այգին, որ գտնվում էր Սուրբ Հռիփսիմե վան- քի շրջակայքում, բոլորեցյան ընդլայնվել և պարսպապատվել է (Ջամբը, էջ 71):

Ալեքսանդր Ա Ջուղայեցին Հայ եկեղեցու ուղղափառության ջերմ պաշտպան է եղել: Նրա կարևոր քայլերից էր Հռոմի Կղեմես ԺԱ պապին ուղղված նամակը: Նամակը գրվել է 1709 թ. փետրվարի 25-ին: Նամա- կի դրդապատճառը լատին քարոզիչների առաջ բերած հուզումներն էին Օսմանյան կայսրությունում ապրող հայության տարբեր հատվածներում:

Լատին միսոներների պառակտիչ քայլե- րը զսպելու համար Ալեքսանդր Կաթողիկոսը վճռեց նամակով դիմել Հռոմի պապին:

→ էջ 8

Հոգևորականի և հոգեբանի դերը մարդու կյանքում

Հարցազրույց Տեր Մանուկ քահանա Չեյնայանի և հոգեբան Գագիկ Պետրոսյանի հետ

— Տեր Հայր, ի՞նչ է հոգևոր առաջնորդի հիմնական դերը մարդու կյանքում: Ի՞նչ է տալիս մարդուն հավատը, որ հոգեբանությունը չի կարող տալ:

— Հոգևոր առաջնորդները Աստծո և մարդկանց միջև կենդանի հաղորդակցության միջնորդներն են՝ օգնելու, որ մարդը ճանաչի իր մեղքը, չհուսահատվի, այլ գտնի Աստծուց ներում հայցելու ճանապարհը: Թե՛ հոգեբանի, թե՛ հոգևորականի ծառայությունը կարևոր է, բայց նրանց նպատակը տարբեր է: Հավատը մարդուն տանում է դեպի հոգևոր նորոգում, մինչդեռ հոգեբանությունը՝ դեպի ներքին աշխարհի հաշտություն: Հոգեբանի օգնությամբ մարդը կարող է հանգստանալ և խաղաղվել մարմնապես, մտովի, իսկ հավատը՝ արժանանալ հոգու փրկության:

— Պարոն Պետրոսյան, ի՞նչ դեպքում մարդը պետք է դիմի հոգեբանին, ի՞նչ դեպքում՝ հոգևորականին: Անձնային իր խնդիրներն են դուրս հոգեբանության և հոգեբուժության սահմաններից, որ կարող են լուծվել միայն հոգևոր դաշտում:

— Ժամանակակից հոգեբանությունը իրարից էականորեն տարբերվող բազմաթիվ տեսությունների և դրանց վրա հիմնվող հոգեթերապիական ուղղությունների մի ամբողջություն է: Չմայած այն համագամանքին, որ այդ բազմազանությունը երբեմն առաջ է բերում որոշակի դժվարություններ, այդուհանդերձ՝ այն ունի նաև դրական կողմ. անձնային խնդիրների ամբողջ շրջանակը՝ հոգեմարմնական խնդիրներից մինչև գոյաբանական հիմնահարցեր, ըստ էության, ենթակա են հոգեթերապիական ազդեցության: Հետևաբար՝ կարելի է որոշակի հանգիստությամբ ասել, որ հոգեբանությունը ներառում է հայտնի և դասակարգված անձնային բոլոր խնդիրները: Սակայն, ինչպես վերևում նշվեց, արդի հոգեբանությունը կազմված է հակասող, երբեմն նույնիսկ իրարամերձ տեսություններից, ինչը կարող է նշանակել, որ գործունեության ընթացքում բժշկ-հոգեբանը կամ հոգեթերապևտն ստիպված է հենվել որոշակի տեսությամբ առաջարկվող մասնավոր կանխադրույթների վրա: Ուստի, հոգեթերապևտի աշխատանքը չի կարող ընդգրկել մարդկային էության բոլոր շերտերը: Հոգևորականի աշխատանքը, այս առումով, ամպլիվարդ է իրարանջատվելու և հոգեբանության հետ համագործակցության հիմք հանդիսացող ուսմունքին կամ վարդապետությանը: Ասվածից պարզ է դառնում, որ անձնային խնդիրների լուծման հարցում հոգեբանի և հոգևորականի տարբերությունը պայմանավորված է ոչ այնքան լուծում պահանջող խնդրի բնույթով, որքան այն կանխադրույթներով, որոնցով ուղղորդվում է լուծման գործընթացը:

— Պարոն Պետրոսյան, ի՞նչ ժամանակներում հոգին և հոգեկանը նույնացվում էին, ժամանակակից հոգեբանական գիտության տեսանկյունից ի՞նչ է հոգին, և արդյոք այն կարելի է նույնացնել հոգեկանի հետ:

— 19-րդ դարավերջին, ենթարկվելով գիտականացման պահանջին, ավանդաբար հոգու մասին

գիտություն համարվող հոգեբանությունը հրաժարվեց հոգուց: Գիտական աշխարհայացքի շրջանակներում հոգին չէր կարող դիտարկվել որպես որոշակի հատկություններ ու ընդունակություններ ունեցող էություն կամ նախահիմք: Սա կհակասեր գիտության մեթոդաբանական կանխադրույթներին, քանի որ հոգին՝ որպես էություն, չէր ենթարկվում գիտական մեթոդներով իրականացվող որևէ հետազոտության: Գիտական հոգեբանությունն ընդհանուր առմամբ ուսումնասիրում էր մարմնի՝ մասնավորապես նյարդային համակարգի ոչ նյութական, հոգեկան դրսևորումները: Հոգին փոխարինվում է հոգեկանով, որն անցնում է նյարդային համակարգում ընթացող կենսաֆիզիկական և կենսաքիմիական գործընթացներից՝ հանդես գալով որպես երկրորդական երևույթ, էպիֆենոմեն: Հոգեկան հատկություններն ու ընդունակությունները զրկվում են իրենց էությունական նախահիմքից՝ հոգուց: Այս վերափոխումը, սակայն, ինչ-որ չափով դարձել էր, և 20-րդ դարում ի հայտ եկան հոգեբանական հայեցակարգեր, որոնք որպես առարկա ունեին հենց հոգին: Կարող ենք հիշատակել Կառլ Գուստավ Յունգի վերլուծական հոգեբանական հայեցակարգը, որտեղ հոգին հանդես է գալիս որպես գործուն էություն: Չմայած այսպիսի հայեցակարգերի սակավությանը՝ դրանք զգալիորեն ազդեցին հոգեբանության ընդհանուր պատկերի ձևավորման վրա, և մեր օրերի հոգեբանությունը տարածվում է ծայրահեղ էպիֆենոմենալիզմից, որտեղ հոգեկանը դիտարկվում է որպես մարմնականից անկախ ոչ իմքենորոյն երևույթ, մինչև ընդգծված ոգեղավանություն (սպիրիտուալիզմ), որտեղ հոգին հանդես է գալիս որպես ինքնուրույն էություն, հոգեկան դրսևորումների նախահիմք:

— Տեր Մանուկ, որքանով է հոգևորականի գործունեությունը նման հոգեբանի աշխատանքին. երկուսն էլ ուղղված են անձնային խնդիրների լուծմանը և մարդու ներքին խաղաղության ապահովմանը, բայց տարբեր մեթոդներով: Դրանք կարող են համատեղվել, թե՛ հակադիր են միմյանց:

— Հոգևորականը մարդու կյանքում Աստծո ճանապարհի ուղեցույցն է, նա մարդուն օգնում է ապրել հավատով, բարի վարքով, ներքին խաղաղությամբ, Տիրոջով: Հավատը մարդուն տալիս է այն, ինչ հոգեբանը չի կարող տալ՝ արդարանալու հույս և հավերժ ապրելու հոգևոր կյանք:

— Պարոն Պետրոսյան, առանց հոգևոր կյանքի՝ մարդը կարող է արդյոք լիովին ապաքինվել հոգեբանական վնասվածքից:

— Հարցի պատասխանը կախված է նրանից, թե ինչ ենք հասկանում լիովին ապաքինվել ասելով: Եթե խոսքը վնասվածքածին իրավիճակից հետո հոգեթերապիական միջամտությամբ կենսագործունեության բնական ընթացքի վերադառնալուն մասին է, ապա՝ այո, կարող է: Ժամանակակից հոգեբանությունն ունի հոգեկան վնասվածքի հետ աշխատելու բավականին արդյունավետ մեթոդներ, որոնք նպաստում են դրա անցանկալի հետևանքների հաղթահարմանը: Սակայն հարկ է նշել, որ վնասվածքածին իրադարձությունը՝ որպես անհատի կյանքի ընթացքում տեղ գտած առանձ-



նահատուկ դեպք, ունի իմաստավորման, արժևորման կարիք: Այս առումով առաջնային կարևորություն են ստանում անհատի աշխարհայացքային դիրքորոշումները: Երևի թե հասկանալի է, որ հոգևոր փորձառությունը, հոգևոր կյանքին ներգրավվածությունը կարող են նպաստել վնասվածքածին իրադարձության նկատմամբ առավել ըմբռնող, ընդունող վերաբերմունքի ձևավորմանը: Այս դեպքում հոգեվնասվածքը կարող է նպաստել անձի հոգեբանական, ինչու է, նաև հոգևոր աճին, զարգացմանը, սեփական գոյության, կյանքի վերաիմաստավորմանը:

— Պարոն Պետրոսյան, իսկ ինչպե՞ս է հնարավոր տարբերակել հոգեբանական ճգնաժամը հոգևոր ճգնաժամից:

— Ճգնաժամ ասելով՝ ընդհանուր առմամբ հասկանում ենք այնպիսի իրավիճակ, երբ անհատի հարմարվողական կարողությունները չեն համապատասխանում փոփոխված պայմաններով առաջարկվող խնդիրներին: Չունենալով համապատասխան միջոցներ՝ մարդը չի կարողանում հարմարվել նոր պայմաններին, լուծել իր առջև ծառացող խնդիրները: Նման իրավիճակը կարող է հանգուցալուծվել կամ անհատի զարգացմամբ, նոր հարմարվողական կարողությունների ձևավորմամբ, կամ էլ անհատի կործանմամբ: Ընդ որում՝ հարկ է նշել, որ մարդու կենսագործունեության ընթացքում նրան առաջարկվող պայմանները կարող են ունենալ ինչպես արտաքին, մակերևութային, այնպես էլ ներհոգեկան, խորքային ծագում: Առաջին դեպքում, երբ անհատը չի կարողանում հարմարվել արտաքին հասարակական միջավայրի պայմաններին կամ լուծել սեփական հոգեկանի մակերևութին (օրինակ՝ իմացական ոլորտում) առաջացող խնդիրները, կարելի է խոսել հոգեբանական ճգնաժամի մասին: Մյուս դեպքում, երբ փոխակերպվում են անհատի գոյության հիմքային շերտերը, երբ առաջ է գալիս Բացարձակի, ամսմանականի հետ հարաբերվելու անհրաժեշտություն, իսկ անհատը դեռևս պատրաստ չէ դրան, խոսքը հոգևոր ճգնաժամի մասին է: Որպես վերջինիս բացասական ելք՝ կարելի է դիտարկել բարոյականության անկումը, արժեհամակարգի սնանկացումը: Հոգևոր ճգնաժամը հաճախ նույնացվում է այս երևույթներին, չնայած իրականում դրանք սոսկ այդպիսի ճգնաժամի բացասական հետևանքներն են: Դրական լուծման պարագայում անհատը կարող է վերածել, վերածվել նոր էության, գտնել սեփական գոյության նոր հիմքեր:

Ներկայիս քաղաքակրթության



ներկայացուցիչը հաճախ կանգնում է երկընտրանքի առջև. Կամ հարմարվել հասարակական միջավայրին և դառնալ արդյունավետ գործառնող հասարակական էակ, կամ շրջվել դեպի սեփական խորքերը՝ աճելով ու ձեռք բերելով հոգևոր էություն:

— Պարոն Պետրոսյան, հոգեբանությունն ինչպե՞ս է վերաբերվում մեղքի և խղճի գաղափարին՝ առանց կրոնական ենթատեքստի:

— Հոգեբանությունն առավելապես գործ ունի ոչ թե մեղքի, այլ մեղքի զգացման հետ: Կարող են լինել մարդիկ, որոնք, մեղք գործած չլինելով, կունենան մեղքի զգացում, և հակառակը: Հոգեբանության համար կարևորվում է հենց այդ զգացումը: Ինչ վերաբերում է խղճին, ապա հոգեբանական որոշ հայեցակարգերում այն ունի հանգուցային նշանակություն՝ որպես մարդու վարքը կարգավորող կարևոր գործոն: Ընդ որում՝ առանց մեղք գործելու՝ մեղքի զգացում կարող է առաջանալ խղճի ազդեցությամբ, երբ վերջինս չափազանց խիստ բարոյական պահանջներ է դնում մարդու առջև: Նման դեպքերում հոգեբանությունը փորձում է հավասարակշռել մարդու վարքը կարգավորող հոգեբանական «ատյանների» փոխհարաբերությունները:

— Տեր Մանուկ, արդյո՞ք անձը կարող է ազատվել մեղավորության զգացումից հոգեբանական մեթոդներով, թե՛ անհրաժեշտ է նաև մեղքերի թողություն:

— Միայն զղջմամբ և ապաշխարությամբ է հոգին ազատվում մեղքերից: Հոգեբանական ոչ մի մեթոդ չի կարող մարդու հոգին մաքրագործել:

— Պարոն Պետրոսյան, կարող է հավատքը բուժել այն հոգեկան ցավը կամ առաքալանքը, որը հոգեբանությունը չի կարողանում վերծանել:

— Հավատը ոչ միայն կարող է բուժել, այլև կանխարգելել հոգեկան ցավն ու տառապանքը: Բանն այն է, որ ժամանակակից հոգեբանությունը, որոշ բացառություններով, չի լքում մարդու անհատական գոյության շրջանակները և փորձում է լուծել նրա խնդիրներն անհատական հատկությամբ: Ի տարբերություն դրա՝ հավատի միջոցով մարդը ներգրավվում է համայն մարդկության, նույնիսկ տիեզերքի պատմությանը, հաղորդակից է լինում անժամանակային, մշտնջենական Բացարձակին, ինչի զորությամբ նրա գոյության մեղ, ժամանակավոր շրջանակները կարծես քանդվում են, նա լքում է իր երկրային կենցաղային սահմանները՝ դուրս գալով ժամանակավոր, անցողիկ գոյության շրջանակներից: Հասկանալի է, որ այս տեսա-

կյունից ցավն ու տառապանքը ձեռք են բերում այլ իմաստ ու նշանակություն, անհատական խնդրից վերածվում են համամարդկային խնդրի, պատժից՝ փորձության, ինչի շնորհիվ դրանց բացասական ազդեցությունը կարող է մեղմանալ կամ նույնիսկ ընդհանրապես վերանայ:

— Տեր Մանուկ, երբ մարդը տաճնապի զգացում է ունենում կամ խոր հիասթափություն է ապրում, ի՞նչ է առաջին քայլը, որ պետք է անի հոգևոր տեսանկյունից:

— Երբ մարդը հեռանում է հավատքից, նրա հոգին զրկվում է Աստծո լույսից, խաղաղությունը վերածվում է դատարկության, և մարդու սիրտն այլևս չի զգում աստվածային ներկայության ջերմությունը: Միայն հավատով է հոգին կենդանանում:

— Պարոն Պետրոսյան, ի՞նչ է տարբերությունը հոգեկան ներդաշնակության և հոգևոր խաղաղության միջև:

— Հոգեկան ներդաշնակությունը վերաբերում է մարդու ներհոգեկան բովանդակության գործառնմանը, երբ դրանք հանդես են գալիս որպես մեկ ամբողջություն, չեն հակադրվում կամ բացառում միմյանց, փոխհամաձայնեցված ու փոխլրացնող են: Հոգևոր խաղաղությունը, հոգեբանության տեսանկյունից, կապված է սեփական գոյության նկատմամբ մարդու վերաբերմունքի, նրա կողմից սեփական կյանքի իրադարձությունների, կենսական իրավիճակների ընդունման ու իմաստավորման հետ: Հոգեկան ներդաշնակությունն ու հոգևոր խաղաղությունն ուղեկցում են միմյանց, ըստ էության՝ կազմում են մարդու հոգեկան, հոգևոր և հոգեբանական առողջություն հիմքերը: Այդուհանդերձ՝ հոգևոր խաղաղությունն ավելի լայն է և կարող է դրսևորվել նույնիսկ այն դեպքում, երբ մարդու հոգում առկա է որոշակի հակադրություն՝ առձակատում: Կարևորն այն է, որ մարդն այդ հակադրությունն ընդունի որպես այդպիսին, որպես տրված մի բան, շնորհի, չներժի այն, չվախենա ու չփախչի դրանից, այլ փորձի ներառել իր կենսափմաստային համակարգ: Սրա համար անհրաժեշտ է որոշակի կենսական իմաստություն, որը ձևավորվում է հոգևոր դաստիարակությամբ, հոգևոր աճի հետ:

— Տեր Մանուկ, ի՞նչ դեր ունի հավատը մարդու կյանքում: Կարող է մարդն ապրել առանց հավատի, և ինչպե՞ս է դա անդրադառնում նրա հոգևոր վիճակի վրա:

— Եթե մարդը հավատք չունենա, չի կարող միայն իր ուժերով փրկվել, որովհետև մեղքը խանգարում է, որ լիովին մաքրվի: Միայն Աստծո շնորհն ու ողորմությունն են զորացնում մարդուն՝ հաղթահարելու իր անկումը և հասնելու փրկության:

— Պարոն Պետրոսյան, ինչպե՞ս են մարդու հոգեկան հատկանիշները փոխվում, երբ նա սկսում է հավատալ, որ իր կյանքն ունի աստվածային նպատակ:

— Պատասխանը միանշանակ չէ, քանի որ որոշ դեպքերում նման հավատը կարող է բերել բացասական հետևանքների: Խոսքը մեծագույնս մոլուցքի մասին է, երբ սեփական կյանքի աստվածային նպատակով օժտվածության հավատը կարող է անհատի մեջ ձևավորել գերակայության զգացում, երբ նա այդպիսի օժտվածությունը դիտարկում է ոչ թե որպես պարտավորություն, այլ որպես իրավունք: ➔ էջ 4

Կառավարման նախօրինակները և առաջնորդների վճռական դերը Սուրբ Գրքում

Աստվածաշունչը ներկայացնում է աշխարհի ձևավորման, հաստատման, շարունակական ընթացքի, ինչպես նաև ավարտի մասին ճշմարտությունը, որը պետք է ազդարարվի Հիսուս Քրիստոսի Երկրորդ գալուստով: Դեռ Սուրբ Գրքի առաջին՝ Ծննդոց գրքում պատմվում է նախամարդ Ադամի ստեղծման պատմությունը: Մինչ այդ Աստված կարգավորում է տիեզերքը, հաստատում երկինքն ու երկիրը, տարանջատում ջուրը ցամաքից, ձևավորում լուսատուները, ստեղծում բուսականությունն ու կենդանական աշխարհը: Այդ ամենի վերջում է միայն կյանք տրվում մարդուն, որ նա տնօրինի Տիրոջ՝ զարմանահրաշ կանոնակարգությամբ արարված աշխարհը: Այսպիսով՝ մարդը տերն է դառնում համայն արարչության:

Առաջին մարդիկ եղեմի պարտեզում ունեին Աստծու օրհնաբեր ներկայությունն ու ամփջական ղեկավարությունը: Կառավարման ավելի արդար և կատարյալ ձև պատմության մեջ այլևս երբեք չի եղել: Այն միայն դրախտում էր, ուր կառավարիչն Աստված էր: Ի վերջո, սակայն, մարդը դուրս եկավ Տիրոջ հաստատած օրենքների շրջագծից, խախտեց Արարչի սահմանած կանոնակարգը, որի հետևանքով զրկվեց Աստծու հետ ամփջական հաղորդակցությունից ու առաջնորդությունից: Մարդկությունը քանակապես բազմանում էր, իսկ կառավարման պատասխանատվությունն արդեն կրում էր առանձնապես յուրաքանչյուր մարդ: Մարդիկ էին որոշում միմյանց ու շրջակայքի ճակատագիրը: Սպանել կենդանիներին որսի համար, թե՛ խնայել կենդանու կյանքը: Հատել բուսականությունն ու փայտաշեն պարագաներ պատրաստել: Ինչո՞ւ ոչ: Ճիշտ այս տրամաբանությամբ մարդուն «տրվեց» անծայրածիր մի աշխարհ, որտեղ կարգուկանոն հաստատողն ինքը՝ մարդը պետք է դառնար:

Իհարկե, Աստվածաշնչում մարդկության զարգացման գործընթացը շատ արագորեն է ներկայացվում: Դժվար է Սուրբ Գրքում գտնել այնպիսի հարցերի ճշգրիտ պատասխաններ, ինչպիսիք են՝ երբ, ի՞նչ պայմաններում և ինչո՞ւ մարդկության մեջ ձևավորվեց տոհմացեղային կացութային խմբակային աստիճանականություն: Սուրբ Գրքն իր

«խոշորացույցը» կարևոր այլ գործընթացների և իրողությունների է բնութագրում: Փոխարենը շեշտադրում է, որ մարդկային բոլոր ազգատոհմերը ձևավորվեցին մեկ մարդուց՝ Ադամից, իսկ ջրիեղեղից հետո արդեն՝ Նոյի սերունդներից: Աստվածաշունչն ընդգծում է բոլորի մեկ լինելու, մեկից ծնված լինելու, հետևաբար՝ արյունակիցներ լինելու գաղափարը:

Դարերի ու հազարամյակների ընթացքում, սակայն, մարդկությունը երբեք չհարմարվեց կառավարման այդօրյա ձևաչափին, մշտապես փորձեց հնարել կառավարելու և կառավարվելու ավելի արդյունավետ ձևեր, և դա շարունակվում է առայսօր: Այդօրինակ որոնումների պատմական վկայություններ են աշխարհակալ կայսրությունները՝ իրենց սկզբնավորմամբ, զարգացման ընթացքով և վախճանով:

Վերադառնալով սուրբգրային մարդկանց՝ հետաքրքրական է, որ առաջին անգամ հստակ ձևավորված տոհմացեղային համակարգ ներկայացվում է Հակոբի տան պատմության մեջ: Հակոբը և նրա 12 որդիները հետագայում դարձան Իսրայելի թագավորության 12 մեծ ցեղերը, ասել է թե՛ կազմեցին պետության 12 նահանգները: Նախահայր Հակոբը գլուխն էր իր ընտանիքի, կառավարում էր այն, հրահանգներ տալիս իր որդիներին, որոնք էլ հնազանդությամբ կատարում էին իրենց նախահոր կամքը: Հետագայում արդեն, որը Քանանի երկրում, որտեղ հաստատված էր Հակոբի տունը, մեծ սով եղավ, հանգամանքների բերումով Հակոբի ամբողջ տոհմը՝ որդիներով ու զարմերով, կանանցով ու դուստրերով, տեղափոխվեց Եգիպտոս, ուր պարենի առատությունը պիտի թույլ տար փրկվել սովահարությունից: Եգիպտոսում Հակոբի (մյուս անունը՝ Իսրայել) զավակներն ապրեցին 430 տարի: Նրանք բազմացան, ձեռք բերեցին որոշակի նյութական կարողություն, բայց, ամենակարևորը, գրեթե իրենց դար պարելով փարավոնական իշխանության ներքո՝ ընտելացան թագավորական համակարգին և իրենց ենթագիտակցության մեջ պահեցին ազգային թագավոր ունենալու անհրաժեշտությունը:

Ելից գրքից բացահայտում ենք, թե ինչպես է Աստված Մովսես մարգարեի միջոցով հրեաներին

դուրս բերում Եգիպտոսից և Սինայի անապատում 40 տարվա դեգերումների ենթարկելուց հետո հասցնում Ավետյաց երկիր: Նախքան խոստացված երկիրը նվաճելը՝ Աստված, կարծես, ակնարկում է, որ մի օր հրեաները պիտի թագավոր ընտրեն, ուստի պատվիրում է իր ժողովրդին՝ այդ ընտրությունը կատարել Իրեն հաճող սկզբունքներով. «Եթե մտնես այն երկիրը, որ Տերը՝ քո Աստվածը, տալու է քեզ, ժառանգես այն ու բնակվես նրա մեջ և ասես՝ «Մենք էլ իշխան ունենանք, մեր շուրջը գտնվող մյուս ազգերի նման», ապա իշխան կկարգես նրան, որին կընտրի Տերը՝ քո Աստվածը: Քո եղբայրներից քեզ իշխան կկարգես: Չհամարձակվես կարգել օտար մի մարդու, որ քո եղբայրը չէ» (Բ Օր. 17:14–15):

Անշուշտ, թագավորություն ունենալու հասարակական որևէ ձգտում վկայում է տվյալ ժողովրդի անկախության բարձր գիտակցության մասին, իսկ նման գիտակցության կարելի է հասնել միայն բարձր զարգացվածության պարագայում: Հրեաներն ապրել էին գիտության, արհեստի, մշակույթի, ռազմական արվեստի մեծ նվաճումներ արձանագրած, ինչպես նաև առասպելաբանական ծանրակշիռ գիտակցություն ունեցող եգիպտական հասարակության մեջ: Հրեաներին առաջնորդող վերնախավը հասկանում էր, որ թագավոր ունենալու բաղձալի նպատակը՝ հասարակական տաժանելի աշխատանք ու անխոցելիություն է պահանջում: Անապատում քարավանի հոսքով ընթացող հրեաները պետք է անապատից դուրս գային որպես օրինապահ ու կարգապահ մի ժողովուրդ: Եվ պատահական չէ, որ նրանց առաջնորդի՝ Մովսեսի աները՝ Մադիամի ըուրմ Հոթորը, ունենալով կառավարման զգալի փորձ, կարևորագույն մի խորհուրդ տվեց Մովսեսին, որը հեղափոխական նշանակություն ունեցավ անապատի հրեաների՝ ամբողջ ժողովրդի վերածման բարդ ծանապարհին: Տեսնելով, թե ինչ դժվարության առջև է կանգնած Մովսեսը հրեաների համար դատավարություն անելու ընթացքում՝ Հոթորն ասաց. «Այդ ի՞նչ ես անում դու ժողովրդին: Ինչո՞ւ ես դու միայն մտած, իսկ ժողովուրդը առավտից մինչև երեկո կանգնած է

շուրջը» (Ելք 18:14): Մովսեսը պատասխանեց իր աներոջը. «Որովհետև ժողովուրդը գալիս է ինձ մոտ Աստծուց իրավունք հայցելու համար: Երբ նրանց միջև վեճ է ծագում, գալիս են ինձ մոտ: Ես դատում եմ նրանցից յուրաքանչյուրին և հայտնում Աստծու հրամաններն ու օրենքները» (Ելք 18:15–16): Հոթորն ասաց Մովսեսին. «Սոսկալի տանջանքներով ես տանջվում դու և քեզ հետ եղող ամբողջ ժողովուրդը: Քեզ համար ծանր է այդ գործը, դա միայնակ անել չես կարող: Արդ, լսի՛ր ինձ, ես քեզ խորհուրդ պիտի տամ, և Աստված քեզ հետ կլինի....Դու ողջ ժողովրդի միջից ընտրի՛ր ուժեղ տղամարդկանց՝ աստվածապաշտ, արդարադատ, գոռոզությունն ատող մարդկանց ու ժողովրդի վրա սրանց հազարապետներ, հարյուրապետներ, հիսնապետներ ու տասնապետներ կարգի՛ր: Նրանք մշտապես թող դատեն ժողովրդին, կարևոր գործերը թող հանձնեն քեզ, իսկ փոքր դատաստանները թող անեն իրենք. դրանով կթեթևացնես քո գործերը, և նրանք կլինեն քո օգնականները» (Ելք 18:17–22):

Այսպես՝ Մովսեսը կատարեց կարևորագույն մի քայլ՝ հրեա ժողովրդի համար կարգեց դատավորներ, որոնք հետագայում դարձան այդ հասարակությանը կարգուկանոն թելադրողները, Աստծուց՝ Մովսեսին տրված Տասնաբանյա օրենքների կատարումը վերահսկողներն ու արդարադատություն իրականացնողները: Շատ ավելի ուշ՝ Մովսեսի, ապա նաև նրա հաջորդ՝ Նավեի որդի Հեսուրի մահից հետո, հրեական մինչթագավորական շրջանում, դատավորները պիտի ստանձնեին հրեա ժողովրդի կատարյալ կառավարումն ու նրանց ազգային կյանքի կազմակերպումը: Այդ մասին վկայում է Հին Կտակարանում՝ Հեսուրի և Թագավորների Ա գրքերի միջև զետեղված անչափ կարևոր՝ Դատավորների գիրքը:

Դատավորների կառավարման շրջանը հրեաներին մեկ քայլով ևս մոտեցրեց թագավորություն ունենալու նպատակին: Դատավորները հրեաներին առաջնորդում էին պատերազմում, կազմակերպում էին ներհասարակական կյանքը, սակայն ժողովրդից անընդհատ շեղվում էր իր ընթացքից, օրինազանցություններ թույլ տալիս և դրանով

թուլացնում իր արժեքային հիմքերը: Դատավորների գիրքն ավարտվում է ուշագրավ մի նախադասությամբ, որը լիարժեքորեն բացահայտում է կառավարման այդ շրջանում հրեա հասարակության մեջ առկա վտանգավոր մի շարք երևույթներ. «Այն օրերին Իսրայելում թագավոր չկար, և ամեն մարդ անում էր այն, ինչ հաճելի էր իրեն» (Դատ. 21:25):

Այսպես՝ գիրքն ինքնին հուշում է, որ դատավորական համակարգը չէր կարողանում լիարժեքորեն կատարել այն բոլոր գործառնությունները, որոնք կբացառեին ամենաթողությունն ու կամայականությունները հասարակական կյանքում: Պատահական չէ, որ որոշ ժամանակ անց հրեաները մեկտեղվեցին այդօրյա իրենց դատավոր Սամուել մարգարեի շուրջը և ասացին. «Մեզ վրա մի թագավոր կարգիր, որ մեզ դատի, ինչպես բոլոր ազգերի մոտ է» (Ա Թագ. 8:6): Հրեաները պահանջեցին թագավոր կարգել իրենց առաջնորդելու համար, իսկ Սամուել մարգարեն զգուշացրեց, թե ինչ է սպասում նրանց, երբ ունենան թագավոր, և վերջինս գործադրի իր ամբողջական լիազորությունները: Մարգարեի բոլոր խոսքերը լսելուց հետո հավաքված հրեաները երկրորդեցին իրենց՝ թագավոր ունենալու ցանկությունը: Տերը խոսեց Սամուել մարգարեի հետ, ուղարկեց նրան Իր ընտրյալի՝ Սավուրի մոտ՝ օծելու նրան Իսրայելի թագավոր: Մարգարեն կատարեց Տիրոջ պատվերը, և կարճ ժամանակ անց հրեաները թագավոր ունեցան, և նա Տիրոջ օծյալն էր:

Տասնամյակների ու հարյուրամյակների ընթացքում, սակայն, հրեաներն ընտրեցին և ունեցան բազում թագավորներ, որոնք ժողովրդին առաջնորդեցին անաստվածության, կռապաշտության, բարոյալքվածության ու պարտության ճանապարհներով: Իսրայելի որդիները կորցրին իրենց շնորհը, կամավորապես հրաժարվեցին Աստծու շավիղներով ընթանալուց, տրվեցին արատավոր բարբերին ու թագավորությունը քայքայեցին: Իսրայելի մեծ թագավորությունը նախ պառակտվեց՝ բաժանվելով երկու մասի՝ Հուդա և Իսրայել, ապա երկու թագավորություններն էլ զրավվեցին, ավերվեցին, իսկ ժողովուրդը գերեվարվեց, տարվեց Ասորեստան ու Բաբելոն: ➔ էջ 5

Հոգևորականի և հոգեբանի դերը մարդու կյանքում

← էջ 3

Այս դեպքում անհատն իր անձը վեր է դասում այդ նպատակից, դրսևորում է գոռոզամտություն, եսապաշտություն, սեփական անձի գերազնահատում: Հակառակ պարագայում, երբ մարդը գիտակցում է, որ իր կյանքով ծառայում է իր իսկ անհատական գոյությանը գերազանցող աստվածային նպատակին, երբ այդ ծառայությունը դիտարկվում է որպես պարտավորություն, նրա մեջ ձևավորվում են ընդհանրության զգացում, հանդուրժողականություն, այլասիրություն, ամենափոքրից, լավատեսություն և բավարարվածության զգացում:

— **Տեր Հայր, մարդը կարող է ինքնուրույն գտնել իր հոգևոր ուղին՝ առանց հոգևոր առաջնորդի:**

— Կարող է, բայց առանց հոգևոր առաջնորդի՝ հեշտությամբ կա-

րող է շեղվել: Հոգևոր առաջնորդը լույս է ցույց տալու ճշմարիտ ծանապարհը...

— **Իսկ կարող է, Տեր Մանուկ, հավատքն օգտակար լինել մարդուն՝ առանց կրոնական ծեսերի մասնակցության:**

— Մարդը կարող է հավատալ և ապրել՝ առանց հոգևոր ծեսերին մասնակցելու, սակայն ծեսերն օգնում են այդ հավատքը խորացնելուն, զորանալուն: Առանց ծեսի՝ հավատքը կենդանի կլինի, բայց միայնակ...

— **Պարոն Պետրոսյան, ի՞նչ է ժամանակակից աշխարհում հոգեբանական ակնհայտ խնդիրը, որ ամենաշատն է վտանգում անձի հոգեկան առողջությունը:**

— Մեր օրերի ամենալուրջ հոգեբանական խնդիրը, երևի թե, մարդու կողմից սեփական գոյությունն ամբողջապես ապրելու

անկարողությունն է: Այս խնդիրը թերևս ակնհայտ չէ, ինչով էլ պայմանավորված է դրա լրջությունը: Բանն այն է, որ ժամանակակից մարդն իր գոյությունն իմաստավորում է առավելապես արտաքին իրականությունից: Պատկերացրեք մեկին, որը, նայելով հայելու մեջ, անվերապահորեն հավատում է, որ ինքն ընդամենը դրա արտացոլանքն է: Գուցե օրինակը փոքր-ինչ չափազանցված է, բայց պետք է խոստովանենք, որ մեզմիջ շատերն իրական կյանքում վարվում են հենց այսպես. իրենց էությունը ճանաչում են դրա արտացոլանքի միջոցով և նույնիսկ նույնականացնում են վերջինիս հետ: Սեփական գոյության, սեփական ես-ի ամփջական ապրումը չի կարևորվում կամ անտեսվում է: Մարդն ինքն իրեն ընկալում է որպես որոշակի դերեր կատարող

հասարակական, որոշակի կառուցվածք ունեցող մարմնական էակ՝ նույնականացնելով դրանց հետ և մոռանալով, որ ունի նաև ներքին, հոգեկան կեցություն: Այս երևույթը սնանկացնում է մարդու գոյությունը, զգալիորեն նվազեցնում այն: Հետաքրքիր է, որ նման վիճակը մեր օրերում չի դիտարկվում որպես հոգեկան խանգարում: Եվ ավելին, բազմաթիվ հոգեկան խանգարումներ բնութագրվում են անձի ներհոգեկան այն բովանդակությունների արթնացումով, որոնք առօրեական կենսագործունեության ընթացքում չեն դրսևորվում, գտնվում են «արտացոլանքի» ստվերում: Հոգեպես առողջ անձ լինելու կարևորագույն պայմանն այն է, որ մարդը հավասարապես ընկալի և ընդունի իր էության բոլոր՝ հասարակական, կենսաբանական, հոգեկան և հո-

գևոր կողմերը, հանդես գա որպես միասնական և ամբողջական էակ:

— **Տեր Հայր, ի՞նչ է ժամանակակից աշխարհի մեծագույն հոգևոր մարտահրավերը, և ի՞նչն է ամենաշատը վտանգում հոգեկան և հոգևոր առողջությունը:**

— Ամենամեծ մարտահրավերը եսասիրությունն է: Հաճախ մարդն իր անձը դնում է Աստծուց վեր: Սրանից առաջանում է հոգու դատարկություն, անտարբերություն, անհանգստություն: Եթե մարդու մեջ երախտագիտության ոգի չլինի, կամ մերձավորի հանդեպ նա սեր չունենա, կկորցնի նաև իր ներքին խաղաղությունը: Ամենավտանգավոր հիվանդությունը երախտամոռությունն է...

— **Շնորհակալություն հարցազրույցի համար...**

Հարցազրույցը՝ ԱՆԻ ՆԱՉԱՐԱՆԻ

Դավաճանության դեպքերն ու ընկալումները Սուրբ Գրքում և քաղաքակրթական տարբեր միջավայրերում

Սկիզբը՝ թիվ 20

Դավաճանության ընկալումը քաղաքակրթական տարբեր միջավայրերում

Տակավին վաղմջական ժամանակներից հայտնի են այնպիսի մարդկանց պատմություններ, որոնք վախից, անձնական շահից ելնելով կամ այս և այլ գործոնների համակցությամբ՝ որոշել են դավաճանել իրենց ընկերներին, իրենց երկրին կամ իրենց սկզբունքներին: Հին եգիպտական, խեթական, ասորեստանյան հնագույն արձանագրություններում հիշատակվում են իրենց երկիրը թշնամուն մատնած տեղացի լուսններ, թշնամու ուժը թերագնահատող պալատականներ, որոնք, թշնամի երկրի կամակատարը լինելով, պաշտոնի հավակնությունից կուրացած, գործել են դավադրության ամեն կանոնների և գաղտնի սկզբունքների համաձայն: Սակայն երկրի ներսում եթե մեկին հաջողվում էր տապալել բռնապետական իշխանությունը, ժողովուրդը նրան արժանացնում էր օվացիաների և հերոսացնում, ինչպես եղավ Ք. ա. 509 թվականին՝ Հռոմեական հանրապետության հիմնադրման ժամանակ, երբ Լուցիոս Յունիոս Բրուտոսն ապստամբություն բարձրացրեց Հին Հռոմի վերջին արքա Տարկինիոս Գոռոզի դեմ և տապալեց հին կարգերը:

Հին հույների համար դավաճանությունը համարվում էր ամենածանր հանցագործությունը: Ծանրագույն պատիժները հատկացված էին դավաճանների համար, իսկ անպատվաբեր մահապատժից հետո չէր թույլատրվում նրանց թաղել հանրային գերեզմանատանը: Աթենական օրենքների համաձայն՝ դավաճանները կամ մահապատժի էին ենթարկվում, կամ վտարվում պետության տարածքից: Հիշենք, թե ինչպես վարվեցին արկադացիները՝ դավաճանին և նրա ընտանիքին քարերով հարվածելով և դուրս վտարելով երկրի սահմաններից, երբ իմացան, որ իրենց զաղտնիքները հայտնել են սպարտացիներին: Իսկ հունական առասպելաբանության մեջ դավաճանության ամենահայտնի օրինակներն առնչվում են ամուսնական անհավատարմություններին, որոնք պատճառ են դառնում արյունահեղ կռիվների (Յասոն և Մեդեա, Ագամեմնոն և Կլիտեմնեստրա, Պարիս, Մենելաոս և Յեդիմե...): Մասշտաբային կամ զանգվածային դավաճանության օրինակներից են սեփական ժողովրդի ուրացումը և մատնումը թշնամի ուժերին: Հայրենիքի դավաճանի վատահռ-

չակ օրինակներից է սապատավոր Եփիալտեսը, որը դավաճանեց իր հայրենիքին՝ հույս ունենալով պարսիկներից ստանալ որոշակի պարգև՝ ցույց տալով Քսերքսեսի բանակին Թերմոպիլե լեռնանցքում հունական դիրքերը, ինչն օգնեց նրանց հաղթել Ք. ա. 480 թ. Թերմոպիլեի ճակատամարտում: Եփիալտեսի դավաճանությունից հետո նրա անունը մնալուն խարան ստացավ. այն նշանակում էր «մղձավանջ» և հունական մշակույթում խորհրդանշում էր արքետիպային դավաճանին, ինչպես Հուլան՝ քրիստոնեական մշակույթում, Վասակը՝ հայոց լեզվամտածողության մեջ, և Բենեդիկտ Առնոլդը՝ ամերիկյան պատմական հիշողության մեջ:

Հրեական թագավորության տարիներին (Ք. ա. 10–6-րդ դդ.) դավաճանություն էր համարվում ամեն խռովություն կամ ապստամբություն՝ ուղղված թագավորական իշխանության դեմ: Հրեական մտածողության մեջ Աստծո օծյալ թագավորի խոսքերին և գործերին հակադարձողը կամ դարանակալ նենգադավորը համարվում էր մահվան ենթակա. թագավորին դավաճանողը համարվում էր թշնամի և ենթակա էր անողորմ մահվան: Ինչպես փաստում է ռաբբիական գրականությունը, հին հրեա թագավորները կարող էին մահապատժի ենթարկել ապստամբության մեղավորներին՝ նրանց արարքը դիտարկելով դավաճանություն: Նույնիսկ եթե թագավորը հրամայել իր հպատակներից մեկին գնալ որոշակի տեղ կամ արգելել նրան լքել իր տունը, նա պետք է հնազանդվեր, ապա թե ոչ՝ մահապատժի կարժանանար: Նա, ով չէր ենթարկվում թագավորական հրամաններին, համարվում էր դավաճան: Դավաճանության մեղադրանքով մահն իրականացվում էր սրով: Թագավորը կարող էր պատժել հանցագործին մահ և այլ կերպ, բայց նա չէր կարող բռնագրավել նրա ունեցվածքը, քանի որ դա կլիներ կոդուպուտ: Հրեական այս սովորույթների մասին է խոսում 12-րդ դարի ռաբբի Մայմոնիդեսը ռաբբիական կրոնական օրենսգրքում՝ Միշնե Թորայում (հայերեն՝ «Թորայի կրկնություն»):

Միջնադարյան ընկալումներում դավաճանության երևույթի ընդգրկումն պատկերը մեր առջև բացվում է, երբ ընթերցում ենք 14-րդ դարի իտալացի բանաստեղծ Դանթե Ալիգիերիի «Աստվածային կատակերգություն» պոեմը: Դժոխքի ինը պարունակներից վերջինում սառած մեծ լճի մեջ են ներկայացվում դավաճանները՝ իրարից, ըստ դավաճանության տեսակի, տարբեր տարածությունների վրա: Այս հոգիների դավաճանական արարքները սիրո (որն Աստված է)

և մարդկային ողջ ջերմության ժխտումն են: Իրենց կենդանության ժամանակ, մերժելով Աստծո սերը և ամուսնելով Բարձրյալի ողորմությունը, այժմ նրանք չհալչող սառցե աշխարհում են հայտնվել, որը նրանց ներաշխարհի էության արտահայտությունն է: Դժոխքի այս վերջին ամենախոր մակարդակը վերապահված է դավաճաններին, ուրացողներին և երդմնազանցներին (այստեղ ամենահայտնի բանտարկյալը Հուդա Իսկարիոտացին է): Այս պարունակի առաջին հատվածում հավաքվածները դավաճանել են իրենց հարազատներին, ինչպես Կայենը դավեց իր եղբայր Աբելին (Ծննդ. 4:8): Երկրորդ հատվածը կոչվում է տրոյացի զինվոր Անտեոքի անունով, որը քաղաքը հանձնել էր հույներին: Այստեղ գտնվում են իրենց երկրի դավաճանները: Դանթեն պատահաբար հարվածում է Ֆլորենցիայի դավաճան Գուելֆի գլխին և այնուհետև սկսում է ավելի դաժանորեն վարվել նրա հետ, քան գործել էր մինչ այդ հանդիպածների նկատմամբ: Երրորդ շրջանում իրենց հյուրերին դավաճանածներն են, ինչպես Պոտոմեոսը, որն իր աներոջը՝ Սիմոն Մակաբայեցուն, և նրա որդիներին հրավիրել էր խնջույքի, այնուհետև սպանել նրանց (Ա Մակ. 16-րդ գլ.): Զորորդ բաժինը, որը կոչվում է Հուդա Իսկարիոտացու անունով, պարունակում է իրենց տերերին և բարերարներին դավաճանածներին: Այս շրջան մտնելուց հետո Վիրգիլիոսն ասում է. «Vexilla regis prodeunt inferni» («Դժոխքի թագավորի դրոշմերը մոտենում են»):

Քրիստոնյա Հայաստանի միջնադարյան կրոնա-փիլիսոփայական մտքում, կանոնական գրականության մեջ նույնպես դավաճանությունը դիտվում է նախառաջ որպես հակաստվածային երևույթ: Անկախ դավաճանության տեսակից՝ այն աստվածային օրենքի խախտում է և արժանի է եկեղեցական խստազանց պատժի: «Կանոնագիրը Հայոց»-ում հստակ սահմանվում են պատիժների կերպն ու դրանց գործադրման ժամանակահատվածը: Երդմնազանց եղողը 10 տարով զրկվում էր հաղորդությունից, մինչև չարտասվեր ու չզոջար իր հանցանքի համար (Բար. Լ), իսկ Քրիստոսին ուրացողն իր ամբողջ կյանքը պետք է անցկացներ ապաշխարությամբ, պահեցողությամբ և աղոթքով (ԹԴԱ. ԻԸ), և միայն վարդապետի իշխանությամբ է, որ նրա ընթացքը վերանայվում է (Բար. Բ. 6ԾԸ): Երբզ մարդդին, ուրացողին արգելվում էր եկեղեցի մտնել, իսկ եթե մեկը հանդգներ, համարվում էր Քրիստոսի խաջողներին հա-



Չոտտո դի Բոնդոնե. «Հուդայի համբույր», 1304—1306 թթ.

վասար (Բար. Բ. 6ՀԹ): Կան ավելի խիստ կանոններ, որոնք աններելի և անփոխհատուցելի են համարում դավաճանությունը: Բարսեղի ԼԶ կանոնում նշվում է, որ չկա իրավական սահմանում՝ դավաճանին փրկության արժանացնելու. նա արժանի է սրի և գերության, իսկ նրա դատաստանը յոթնապատիկ առավել կլինի, քան սպանողներինը:

Հետաքրքրական է, որ Հայ Առաքելական Սուրբ Եկեղեցու՝ մեղքերի խոստովանության ընդհանրական աղոթքում («Մեղայ Ամենասուրբ Երրորդութեանն») չի հիշատակվում դավաճանությունը: Սակայն երբ փորձում ենք ներկայացվող մեղքերի պատճառագիտության մեջ խորանալ, պարզ է դառնում, որ յուրաքանչյուր մեղքի հիմքում դավաճանական մղումն է՝ ընդդեմ Աստծո և մարդկային բարեկեցեղ հարաբերությունների:

Հայրենիքի դավաճանությունը, միջնադարյան իրավակարգի համաձայն, առավելապես ենթարկվել է մահապատժի, հաճախ՝ կախաղանի, իսկ զինվորականների դեպքում՝ գնդակահարության: Անգլիայում պետական դավաճանության (լատ.՝ perduellio) համար սահմանված էր պատիժների մի շղթա՝ տանջամահ անելով կախել, փորը թափել և քառատել (Hanged, drawn and quartered): Ինչպես հնագույն ժողովուրդների կանոնական մտածողության մեջ էր ամրագրված, այնպես էլ Թյուրոքների ժամանակներից Անգլիայում թագավորական օրենքների և հրամանների ոտնահարումն ու խախտումը դավաճանություն էին դիտարկվում: Պետական դավաճանությունը դիտարկվել է որպես հանրագիտարանային հիմնական սահմանում, ինքնիշխան պետության կամ նրա ղեկավարի դեմ հարձակվելու հանցագործությունը բնութագրող ընդհանուր հասկացություն (Encyclopaedia Britannica, 1911):

Դավաճանության համդեպ խիստ վերաբերմունքը և պատժելիությունը նպաստում էին դրա հանդեպ միանշանակ բացասա-

կան գնահատականի ձևավորմանը և այն ընդօրինակելուց խուսափելուն:

Դավաճանությունը, սակայն, շատ արարքների նման ընդօրինակելի է՝ չնայած դրա դեմ հնչած խիստ բացասական քննադատություններին: 17-րդ դարի անգլիացի նշանավոր փիլիսոփա Թոմաս Հոբսն իր «Լեխիաթան, կամ Եկեղեցական և քաղաքացիական պետության նյութը, ձևաչափը և իշխանությունը» (անգլ.՝ Leviathan or The Matter, Forme and Power of a Common Wealth Ecclesiastical and Civil) տրակտատում անդրադառնում է դա-

վաճանության հանդեպ մարդկային հակմանը: Թոմաս Հոբսի մտածողությունը հիմնված է մատերիալիզմի փիլիսոփայության վրա, քանի որ նա պնդում է, որ մարդկային բոլոր մտքերն ինչ-որ կերպ առաջին հերթին ընկալվում են զգայարաններով, ինչը նշանակում է, որ զգայարանները նախ պետք է շփվեն առարկայի հետ, նախքան այդ առարկան կդառնա մարդու երևակայության մաս: Հոբսի սեփական անկողմնակալ մտքերն արտացոլում են իր ժամանակի քաղաքական խռովությունները: Քաղաքացիական պատերազմի մասին նրա հիշատակումը վերաբերում է Անգլիայում քաղաքացիական պատերազմին, որի ընթացքում թագավոր Չառլզ I-ը գերի է ընկել և մահապատժի ենթարկվել խորհրդարանականների կողմից: Հոբսը ենթադրում է, որ նրանք, ովքեր գերել են Չառլզ I-ին, դա արել են 30 արծաթի դիմաց, ինչը Հուլան ստացավ Հիսուսին դավաճանելու համար, բայց նա մահ առաջարկում է, որ ամբողջ միտքը, անկախ նրանից, թե որքան պատահական է, կապված է և հիմնված է փորձի վրա:

Այսպիսով՝ դավաճանությունը մարդկային, հասարակական, հոգևոր մեծագույն աղետ է, որը վնասում է առողջ հարաբերությունները, փոթորկում ազգերի խաղաղ և բարգավաճ ընթացքը և պատճառ դառնում աստվածային պատժի ու դատապարտման: Երբ խախտվում են հոգևոր-արժեքային, հոգեբանական սահմանները, կուրամիտ որոշումներով, նենգահակ նկրտումներով և օտարամուլ գաղափարաբանությամբ ապակայունացնում ազգային բարոյական դիմագիծը, պարարտ հող է ստեղծվում դավաճանության համար, և մարդիկ դառնում են դավաճանության զոհեր և հակամարտում աստվածային Բանի անվախճան ճշմարտության դեմ:

**Նարեկ սրկ. ԳԱՄԱՐՅԱՆ
ՕՖԵԼՅԱ ԳԱՄԱՐՅԱՆ**

Կառավարման նախօրինակներ....

← էջ 4

Այսպես՝ թագավորները, որ հրեաներին իրականում պետք է առաջնորդեին արդարության և ճշմարտության ճանապարհով, ժողովրդին տարան դժոխքի ու կործանման ուղիներով: Տանջված ու հալածված բարեպաշտ հրեաները հայցում էին Աստծու ողորմությունը՝ խնդրելով իրենց համար մի նոր թագավոր, որը կվերացնի իրենց երեսից անարգանքն ու անօրը, կվերահաստատի նախկին փառքն ու զորու-

թյունը: Իսկ Աստված մարգարեների միջոցով խոստանում էր միայնակ չթողնել Իր սայթաքած ժողովրդին՝ որպես գոտեպնդում ասելով, որ մի նոր Օծյալ պետք է ուղարկի նրանց համար, որը և վերջապես պետք է ուղղորդի Իր ժողովրդին աստվածային ճանապարհներով: Ահա այս խոսքերով է Եսայի մարգարեն նախանշում հրեաների՝ Տիրոջից ուղարկված փրկությունը. «Այն ժողովուրդը, որն ընթանում էր խավարի միջով, մեծ լույս տեսավ. ձեզ հա-

մար էլ, որ բնակվում եք աշխարհում և մահվան սովերների մեջ, լույս պիտի ծագի...» (Ես. 9:1), «...քանզի մեզ համար Մանուկ ծնվեց, մի Որդի տրվեց մեզ, որի իշխանությունն Իր ուսերի վրա է. Նա Մեծ խորհրդի պատգամաբեր պիտի կոչվի, Աքանջելի խորհրդական, Աստված հզոր, Իշխան, Հայր հավիտենական: Ես խաղաղություն կբերեմ Նրա իշխաններին, իսկ Իրեն՝ առողջություն: Մեծ է Նրա իշխանությունը, և Նրա խաղաղությունը սահման չունի: Նա

պիտի նստի Դավթի աթոռին, Նրա թագավորությունը պիտի զորանա և հաջողվի իրավունքով ու արդարությամբ այսուհետև և հավիտյան հավիտենից: Զորությունների Տիրոջ նախանձախնդրությունը պիտի կատարի այդ» (Ես. 9:5–6):

Տիրոջից առաքվող փրկության բոլոր խոստումներն աշխարհի Փրկչի՝ Հիսուս Քրիստոսի մասին էին: Աստված ոչ միայն հրեաների, այլև տառապյալ համայն մարդկության համար կատարեց Իր խոստումը, որ մարդկությունն այլևս Իր առաջնորդությունը բոլորանվեր կերպով չչլատահի իրենից ընտրված

որևէ կայսեր, թագավորի, դատավորի կամ կառավարչի, որ մարդկությունն այլևս չսայթաքի՝ հետևելով մեղավորներին, այլ միայն ու միայն ապրի Փրկչի նախանշած ճշմարիտ ճանապարհով, և որպեսզի, ինչպես գրում է Պողոս առաքյալը, «Հիսուս Քրիստոսի անվանն ամեն ծունկ խոնարհվի՝ թե՛ երկնավորների, թե՛ երկրավորների և թե՛ սամոարամետականների, և ամեն լեզու խոստովանի, որ Հիսուս Քրիստոսը Տեր է՝ ի փառս Հայր Աստծու» (Փիլ. 2:10):

**Արման սրկ. ԲՈՒՆԱՐՁՅԱՆ
Արմինե ՀՈՎՀԱՆՆԻՍՅԱՆ**

Ի՞նչ է կարգալուծությունը

Ինչ է տեղի ունենում կարգալուծության դեպքում

Եկեք պարզենք, թե ինչ է տեղի ունենում կարգալուծության դեպքում՝ համաձայն Չայ Առաքելական Ուղղափառ Եկեղեցու դիրքորոշման, մասնավաճ որ վերջերս որոշ կարգալույծներ պնդում են, թե կարգալուծությունից հետո իրենց քահանայական օծումը մնում է, որով իբրև թե իրենք չեն դադարում քահանա լինելուց։ Այդպիսով նրանք նաև մոլորեցնում են իրենց հետևորդներին, որոնք հավատալով՝ շարունակում են մասնակցել նրանց չպատարագներին, ստանալ չհաղորություն, նրանց ձեռամբ չմկրտվել, չպսակվել և այլն։

Նախ անհրաժեշտ է դիտարկել այս հարցը «Կանոնագիրք Չայոց»-ի տեսանկյունից, որը ներառում է առաքելական կանոններից սկսած՝ մինչև միջնադարյան Չայ և Ընդ-հանրական Եկեղեցու հայրերի հաստատած կանոնները։ Կարգալույծ անելիս տարբեր կանոններ հրամայում, հրահանգում են լուծարել եպիսկոպոսի, քահանայի, սարկա-վագի կարգը, այսինքն՝ օծյալ հոգևորականի քահանայությունը, ինչպես նաև օծումը։

Չստակեցնելու համար, որ լուծարումը վերաբերում է քահանայությանն ամբողջապես, տարբեր կանոններ ասում են, որ լուծարվում է քահանայությունը. «.... քահանայութիւնն լուծցի կամ յերիցութենէն լուծցի» (Սահմանք եւ կանոնք կարգի Աստուծոյ սրբոյ Եկեղեցոյ, գոր եղին վարդապետք Չայոց ի լրութիւն Առաքելական եւ Նիկիական կանոնաց հաստատութիւն, կանոններ ԵՅԶ (ԵՅԲ) Բ, ԵՂԳ (ԵԶԹ) ԺԹ, ԵԶԳ (ԵՅԹ) Թ), կամ լուծարվում է քահանայությունից. «....լուծեալ ի քահանայութենէ» (Կանոնք երկրորդ առաքելական, կանոն ԽԵ (ԽԴ) ԺԱ)։

«Կանոնագիրք Չայոց»-ը ցույց է տալիս, որ լուծարումը վերաբերում է ոչ միայն քահանայությանը, այլև օծմանը. «....լուծցի յօծմանէն եւ եղիցի նզովեալ» (Բասդի գիր կանոնական, կանոն ՌՅԱ (ՌԿԳ) ԾԼԸ), ինչպես նաև քահանայական շնորհին, ձևին և նշանին. «.... այնպիսին ամենևին բարձցի ի քահանայական շնորհէն, եւ ձեւն եւ նշանն» (Սահմանք կանոնաց Սուրբ Առաքելոյն Թադէոսի, կանոն Չիս (ՉԼԴ) ԺԱ)։

Եկեղեցական կանոնները պատվիրում են նաև լուծարումից հետո, ըստ նախատեսության, նզովել, եկեղեցու բաժնից հեռացնել կամ համարել ամբարիշտ. «....համարեալ եղիցի, որպէս զամպարիշտն» (Սահմանք եւ կանոնք կարգի Աստուծոյ սրբոյ Եկեղեցւոյ, գոր եղին վարդապետք Չայոց ի լրութիւն Առաքելական եւ Նիկիական կանոնաց հաստատութիւն, կանոն ԵԶԸ (ԵԶԴ) ԺԴ)։ Չայ Առաքելական Եկեղեցում եկեղեցական կարգից հեռացվածներին նզովել են ծանրագույն հանցագործությունների դեպքում, մնացած հանգամանքներում դասել են աշխարհականների շարքը, չնայած որ կանոնը թույլ է տալիս նաև, ըստ հանգամանքի ծանրության, տվյալ անձին ամբարիշտներին հավասար համարել։

Կաթոլիկ եկեղեցու դիրքորոշումը

Քահանայական ձեռնադրության անջնջելիությունը Կաթոլիկ եկեղեցու ուսմունք է, որը հաստատվել է Տրիդենտյան ժողովում և գործադրումն է այդ ժողովի որոշումների։ Սույն ժողովը Կաթոլիկ եկեղեցու 19-րդ «տիեզերական» ժողովն է՝ գումարված 1545—1563 թթ.։ Այսինքն՝ նշյալ ժողովի որոշումները տարածվում են ժողովը գումարած Կաթոլիկ եկեղեցու և միջնադարյան այդ ժողովի որոշումներն ընդունողների վրա։ Չայ Առաքելական եկեղեցին ընդունում է միայն տիեզերական երեք ժողով։ Կաթոլիկ եկեղեցին իր բոլոր կարևոր ժողովները տիեզերական է հռչակել, որոնք, ըստ էության, միայն մեկ եկեղեցու ներեկեղեցական հավաքներ են, և որոնց տիեզերական լինելը չեն ընդունում մյուս եկեղեցիները։ Այսպիսով՝ քահանայական ձեռնադրության անջնջելիության ուսմունքը կաթոլիկների «տիեզերական» ժողովի ուսմունքն է, ըստ որի՝ վավերականորեն ստացված ձեռնադրությունն անվավեր չի դառնում, սակայն հոգևորականը կարող է կորցնել հոգևոր կարգը՝ զրկվելով իր բոլոր պաշտոններից և իրեն լիազորված ողջ իշխանությունից։

Ստացվում է, որ կաթոլիկ քահանան կարող է բաժանվել եկեղեցական իշխանությունից, արգելված լինել, կարող է բոլորովին հեռանալ քրիստոնեությունից՝ պահպանելով առաքելական ձեռնադրությունը։ Փաստորեն՝ ձեռնադրյալն իր հերթին կլինի շնորին ինքնուրույն կրող աղբյուր, որից կարող է օգտվել ըստ իր հայեցողության՝ բոլորովին հաշվի չնստելով իրեն ձեռնադրողների ո՛չ ուսմունքի, ո՛չ ցանկությունների հետ։

Սակայն հստակ է, որ կաթոլիկները, քահանայության կամ մկրտության անջնջելիության ուսմունք ստեղծելով, նպատակ չեն ունեցել քահանայության կարգից զրկվածների կամ ուրացյալ մկրտյալների շահերը պաշտպանել և նրանց «բացառիկ անձեր» հաստատել (կաթոլիկներն էլ են այդպիսիներին դատապարտելի համարում), այլ մի-միայն ցանկացել են աստվածային շնորհի անյեղատելի բնույթը շեշտել, անգամ եթե այն ստացած անձը պղծում է իր ընթացքը։

Ուղղափառ եկեղեցու դիրքորոշումը

Կարգից զրկված հոգևորականի կատարած «ծեսը» չունի ո՛չ իրավական և ո՛չ էլ հոգևոր որևէ նշանակություն՝ այսպես կոչված քահանայության խորհրդի անջնջելիության իմնավորմամբ։ Իսկ անջնջելի, ըստ Ուղղափառ եկեղեցու վարդապետության, միայն նշանակում է, որ այդ խորհուրդը չի կարող միևնույն կերպով կրկնվել նույն անձի վրա։ Սա նշանակում է, որ կրկնամկրտություն կամ կրկնաձեռնադրություն չի կատարվում, քանզի հակառակ դեպքում աստվածաբանական ընկալումով ընդունելի կլիներ, որ անձի անարժանության, պղծության, նրան կարգից հեռացման պարագայում եղծվում է

նաև նրան տրված աստվածային շնորհը, և այն պետք է կրկնել՝ շնորհը շտկելու կամ սրբելու համար։ Այդ պատճառով էլ ոչ թե քահանայության կամ մկրտության անջնջելիությունն է հաստատագրվում, այլ դրանց անդրադառնալով՝ շեշտվում է աստվածային շնորհի անեղծանելիությունը։

Չայ Առաքելական Ուղղափառ եկեղեցու դիրքորոշումը

«Կանոնագիրք Չայոց»-ի կանոնները հաստատում են, որ կարգալույծ արվածը բոլորովին զրկվում է քահանայական շնորհից, ձևից և նշանից. «....այնպիսին ամենևին բարձցի ի քահանայական շնորհէն, եւ ձեւն եւ նշանն» (Սահմանք կանոնաց սուրբ առաքելոյն Թադէոսի, կանոն Չիս (ՉԼԴ) ԺԱ)։ Կանոնագրքում գործածված սահմանումներով՝ քահանայական կարգից, շնորհից, օծումից, ձևից և նշանից զրկումը կատարվում է ոչ միայն ծանր հանցագործությունների դեպքում, այլև եկեղեցական կարգավորության անհնազանդության, եկեղեցական պատշաճության խաթարման համար։

Իսկ ինչպես հասկանալ «շնորհի» և «օծման» լուծարումը։ Երբ կանոնն ասում է, որ օծումը լուծարվում է, նշանակում է, որ օծումը կամ դրա հետ կապված շնորհը դադարում է գործել՝ վերցվելով անհնազանդ հոգևորականից, քանի դեռ նա պառակտման և անհնազանդության մեջ է, քանի որ շնորհի գործելու գլխավոր պայմանները հնազանդությունն ու խոնարհությունն են։ Քահանան, որ խախտել է եկեղեցու միասությունը, կտրվում է խորհուրդների շնորհների աղբյուրից՝ Աստծուց, որը գործում է միայն եկեղեցու Մարմնի միջոցով։ Երբ կանոնն ասում է, որ ձևն ու նշանն են վերցվում, դա նշանակում է, որ քահանայի արտաքին նշանները (հոգևոր զգեստը, անունը) և նրա կատարած ծեսի ձևը (բանաձևը) չունեն բովանդակային իշխանություն։ Այս դեպքում «լուծարումը» հոմանիշ է անվավերության, քանի որ քահանայի կատարած խորհրդի միջոցով չի փոխանցվում Սուրբ Յոզու շնորհը, որովհետև կարգալույծ քահանան եկեղեցուց դուրս է գործում և ինքնաբերաբար՝ Աստծո կամքից դուրս։

Այսպիսով՝ կարգալուծության դեպքում, Չայ Առաքելական եկեղեցու տեսանկյունից, տեղի է ունենում ավելին, քան պարզապես իրավական սահմանափակումն է։ Կարգալույծի կողմից ոչ մի եկեղեցական խորհուրդ չի իրագործվում։

Քահանայական դրոշմը՝ որպես հնարավորություն, տեխնիկապես մնում է, և դա է պատճառը, որ ապաշխարող քահանային կրկնաձեռնադրություն չի արվում։

Յովհաննես Արժիշեցին ընդգծում է. «Քահանայական շնորհը մշտամնա է, եթե հոգևորականն իր կարգի մեջ է։ Իսկ եթե կարգի մեջ չէ, չի կարող պատարագ մատուցել, չի կարող օգտվել քահանայագործության, խորհուրդների կատարման իրավունքներից և ոչ էլ շնորհաբաշխության իրավունքն

ունի։ Կարգից լուծարումը վերաբերում է նաև օծումից լուծարելուն»։

Վերջապես, «Կանոնագիրք Չայոց»-ը խստագույնս է անդրադառնում այն հոգևորականներին, որոնք կարգալուծությունից հետո կհամարձակվեն մոտենալ երբեմն իրենց վստահված ծառայողական պաշտոնին։ Մասնավորապես, կանոնը հրամայում է. եթե կարգալույծ արվելուց հետո քահանան համարձակվի շարունակել գործել որպես քահանա, ապա նա ամբողջվին թող արտաքսվի եկեղեցուց. «....եւ համարձակեսցի մերձենալ յաւանդեալսն երբեմն մմա պաշտաւն, սա ամենևին ի բաց հատեալ անկցի յեկեղեցոյ» (Կանոնք Առաքելական ի ձեռն Կղեմայ, գլուխք ԶԵ, կանոն ԻԶ), իսկ նրանից մկրտվածներին ու պսակվածներին պարտադիր է նորից մկրտել և նորից պսակել. «Քահանայ որ լուծեալ է ի կարգէն վասն չար գործոց՝ զմկրտեալն եւ զպսակեալն ի նմանէ պարտ է այլ նորոգել» (Կանոնք Բասդի պէսպէս ախտից, գլուխք ՄՅԲ, կանոն ԻԸ)։ Իսկ եթե որևէ քահանա արհամարհի իր եպիսկոպոսի հրամանը, երբ եպիսկոպոսը նրան մերժի և հեռացնի եկեղեցուց, և նա մարդկանց առանձին հավաքի ու սուրբ սեղան հաստատի, այդպիսիին պետք է ամբողջությամբ մերժել և այլևս մխիթարության խոսք չասել, քանզի այլևս չի կարող կրկին նույն պատիվն ընդունել։ Իսկ եթե համառի ու խռովություններ հարուցի, եկեղեցու վրա արտաքին իշխանությամբ կամ այլ ուժի օգնությամբ ամբոխ բերի, այդպիսիին՝ իբրև խռովարարի, պետք է հնազանդեցնել ու սանձերը քաշել. «....զայնպիսիսն բնաւին մերժել արժան է եւ ոչ եւս մխիթարութեան ինչ հասուցանել իբրև ոչ եւս կարող են զնոյն պատիւ ընդունել ամենևին։ Ապա եթէ յամեսցեն եւս ի նմին իրս խռովութիւնս առնել եւ ամբոխս յարուցանել յեկեղեցոյ վերայ յարտաքին իշխանութենէ եւ ի զաւրութենէ ուստեք, զայնպիսիսն իբրև զխռովարարս դարձուցանել եւ սանձաբեկ առնել արժան է» (Կանոնք Անտիոքայ, ԱՆՏ, կանոն Ե)։

Եզրակացություն

Կարգալույծ քահանայի պնդումը, թե իր օծումը մնում է և հիմք է հետագա քահանայագործման, կեղծ ու անհիմն է։ Կարգալուծությունը լուծարում է քահանայական շնորհի գործունեությունը և ուժը՝ կտրելով այն եկեղեցու կենսարար միասնությունից։ Քահանայական կարգը, շնորհը, օծումը, նշանը և ձևը փոխկապակցված են։ Չրկվելով կարգից՝ քահանան զրկվում է և դրանցից։ Նրա ձեռամբ ոչ մի «խորհուրդ» վավեր չէ թե՛ իրավական և թե՛ հոգևոր տեսանկյունից։ Օծումը քահանայի սեփականությունը չէ, որ իր կամքով պահի, այն տվողն է վերցնում և դարձյալ վերադարձնում։ Այսպիսով՝ «լուծարում» բառը նկարագրում է շնորհի գործադրման լիակատար դադարեցում, որը ոչ միայն կանոնական պատիժ է, այլև հոգևոր հետևանք։

Սամվել դաիր ԳՐԻԳՐԻՅԱՆ**Շնորհք աբղ. ՊԱՆՈՅԱՆ**

Հանգիստը որպես հոգևոր կյանքի անբաժան մաս

Աշխատանքն այն կոչումն ու առաքելությունն է, որ Աստծուց տրված է մարդուն դեռևս դրախտից։ Ադամի մասին Ծննդոց գրքում կարդում ենք. «Տեր Աստված Իր ստեղծած մարդուն տեղավորեց բերկրության դրախտում, որպեսզի սա մշակի ու պահպանի այն» (Ծննդ. 2։15)։ Աստվածաշունչը հստակորեն ցույց է տալիս, որ իդեալական կյանքն ամենևին բացարձակ անգործություն չի ենթադրում, դրախտային վայելքը պարունակում է ստեղծարարություն և արդյունավորում։ Ի վերջո, Աստված ևս, Իր անսահման սիրուց *արարեց* աշխարհը։ Աստված մշտապես գործել է և շարունակում է *գործել*. «Իմ Չայրը մինչև այժմ գործում է, ուրեմն ես ևս գործում եմ» (Յովի. 5։17)։ Արարչությունը, փրկագործությունը, Սուրբ Յոզու ներգործությունը և Չայտնության գրքում նկարագրվող գալիք իրադարձությունները վկայում են, որ Աստծո էության անբաժան մասն է գործելը։ Աշխատանքի

բարի բնույթի և ծուկության մեղսավորության մասին անդադար խոսում են Սուրբ Գիրքն ու եկեղեցու վարդապետությունը։ Բավական է նշել միայն, որ յոթ մահացու մեղքերից մեկը հենց ծուկությունն է։

Սակայն ինչպես ցանկացած բարի բան, նույնպես և աշխատանքը, կարող է մարդու հոգևոր կյանքում ունենալ բացասական ազդեցություն, եթե խախտվի կյանքում դրա ներդաշնակ տեղաբաժանումը։ Աշխատանքը մարդու կյանքում որքան էլ որ ունի առանցքային նշանակություն, այնուամենայնիվ, քրիստոնեական ընկալման մեջ ոչ պակաս կարևոր է նաև աշխատանքից հանգիստը։

Արարչագործության պատմության մեջ կարդում ենք. «Աստված վեցերորդ օրն ավարտեց արարչագործությունը եւ Իր կատարած բոլոր գործերից հետո՝ յոթերորդ օրը, հանգստացաւ» (Ծննդ. 2։2)։ Այս արտահայտությունը քննաբանվել է բազմաթիվ

աստվածաբանների ու Սուրբ Գրքի մեկնիչների կողմից, սակայն այն նախևառաջ օրինակ է՝ տրված մարդկությանը։ Յիսուս Քրիստոսի մասին ևս Ավետարաններում բազմիցս հիշատակվում է, որ հանգստանում էր (Մարկ. 6։31, Մաթթ. 8։24 և այլն)։ 10 պատվիրաններից չորրորդը պատգամ է՝ շաբաթ օրը սուրբ պահելու։ Այդ օրը հրեաները բացարձակապես ոչ մի գործ չէին կատարում, որովհետև Տերը նույնպես 7-րդ օրը հանգստացել է։ Անշուշտ, Քրիստոսի մարդեությունը և փրկագործությանը այս քարացած օրինապաշտությունը նոր կյանք ու լրացում է ստանում մարդկության կյանքում, երբ մենք սուրբ ենք պահում 7-րդ օրը՝ կիրակին՝ մասնակցելով Սուրբ Պատարագի։ Սակայն մարդկությունը վաղուց որդեգրել և հասկացել է հանգստի կարևորությունը՝ կյանքի բնական ռիթմը պահպանելու, աշխատանքից բացի՝ նաև կյանքի այլ ոլորտների՝ հոգևոր պահանջմունքներին, ընտանիքին,

մտերիմներին և այլոց, ժամանակ հատկացնելու անհրաժեշտությունը։

Յետաքրքրական է՝ միայն շաբաթ օրվա վերաբերյալ պատվիրանը չէ, որ Յին Կտակարանում Աստված տալիս է հրեաներին՝ կապված հանգստի հետ։ Գոյություն ունի նաև շաբաթ տարվա և հորեյյանական տարվա գաղափարը։ Աստված պատգամում է հրեաներին, որ հողը մշակեն վեց տարի, իսկ յոթերորդ տարին այն հանգիստ թողնեն (Ելք 23։10—11)։ Սա խոսում է այն մասին, որ աստվածային սկզբունքը տարածվում է ոչ միայն մարդկության, այլև ողջ բնության վրա։ Իսկ յոթ շաբաթատարիներից հետո՝ 50-րդ տարին, հռչակվում է Յոթեյյանական տարի։ Այն նաև հայտնի է որպես ազատագրման տարի, որի ընթացքում հողերը վերադարձվում էին իրենց տոհմական տերերին, պարտքերը ներվում էին, իսկ ստրուկները՝ ազատ արձակվում (Ղևտ. 25։8—17)։

→ էջ 8

Խրիմյան Հայրիկի կերպարը գրականության մեջ և արվեստում

«ես՝ իբրև Աւետարանի աշակերտ, ձեզ միայն մի բան կը կտակեն, այն է՝ «սիրեցեք զմիմեանս», այսինքն՝ իրարու սիրեցեք: Եթէ ճշմարիտ աւետարանական սիրով զիրար սիրէք, էլ ձեզ ոչինչ չի պակսիր, մանաւանդ օտարութեան մէջ շատ աւելի պէտք ունինք իրար սիրելու.... Սիրելիներ, ցանկացայ վերջին անգամ ևս ձեզ հետ խօսել, ձեզ Աւետարան բացատրել, բայց կարճ և երեք տառերով պիտի ասեն, ինչ որ Աւետարանի ընդհանուր բովանդակութիւնն է, այն է՝ «սէր», այո՛ր, Աւետարան ամբողջ իւր մէջ սէր է բովանդակում, զի Աստուած սէր է.... Եթէ կան ձեր մէջ անբաւականութիւններ, հեռացրէ՛ք ձեզանից այդ ոգին, իրարու հետ սիրով և խաղաղութեամբ ապրեցէ՛ք, և պիտի տեսնաք, որ երջանիկ պիտի լինիք»:

Սկրտիչ Ա Վանեցի

Ասպարակականի արծիւը՝ Խրիմյան Հայրիկը (Ամենայն Հայոց Կաթողիկոս Սկրտիչ Ա Վանեցի, աթոռակալել է 1892—1907 թթ.), ոչ միայն ականավոր հոգևորական գործիչ էր, այլև ջերմ ու անմնացորդ հայրենասիրությամբ, մաքառող զինվորային, ազգային ինքնագիտակցությամբ բոցավառ ոգու պահապան վահանի, լուսավորության քարոզչի ու պաշտպանի կենդանի խորհրդանիշ: Նա հայ մշակույթի ու ազգային կյանքի երևելի ներկայացուցիչներից է, բարձրաստիճան հոգևորական, հրապարակախոս, մեծ մանկավարժ և կրթական գործի հմուտ կազմակերպիչ: Նրա ամբողջ կյանքն անմնացորդ նվիրում էր հոգևոր-եկեղեցական, կրթալուսավորչական, ազգային և հասարակական-քաղաքական գործին:

Վանի Այգեստան քաղաքամասի Հայնկույսներ թաղամասում ծնված այս հզոր ազգային-հոգևորական գործիչն ու լուսավորչահիմն Մայր Աթոռի 125-րդ գահակալն իր ուղին սկսեց ու կյանքի հետագա ամբողջ ընթացքում ուղենիշ ունեցավ «Ես եմ հովիւն քաջ. հովիւն քաջ զանձն իւր դնէ ի վերայ ոչխարաց իւրոց» (Հովհ. 10.11) ավետարանական խոսքերը, որոնք դարձան նրա փոթորկահույզ, մրկկածուկ կյանքի անխախտ մշտնաբանը: Նրա քարոզները ազգային կրթության, հասարակական լայն զանգվածների լուսավորության և հայրենասիրական դաստիարակության ուսանելի դասեր ու հոգեցունց կոչեր էին: Խրիմյան Հայրիկը կարողացավ ստեղծել իսկական ազգային դպրոցներ և դաստիարակել ազգային բարձր ինքնագիտակցությամբ օժտված, համամարդկային ու ազգային անանց արժեքներ կրող և գիտելիքներով զինված սերունդ, որը բանիվ և գործով նվիրվեց հայ ազգային-ազատագրական պայքարի նվիրական գաղափարին ու գործին:

Խրիմյան Հայրիկի կյանքի ամենահուզիչ դրվագներից էր Բեռլինի կոնգրեսից նրա վերադարձը, երբ նա իր հանճարեղ պատգամով հայ ժողովրդին տվեց «Երկաթե շերտի» հավերժ արդիական ու խրատական դասը: Նա ցույց տվեց, որ հայը պետք է ունենա «երկաթե շերտի»՝ ապավինելով միայն ու միայն սեփական բազկի զորությանը, դրսևորի անկրտրուն կամք ու միասնականություն, լինի հաստատական ու պահանջատեր, որպեսզի կարողանա ազատագրել սուրբ հայրենիքն ու պաշտպանի սեփական իրավունքները: Միաժամանակ, նա պայքարում էր պանդխտության դեմ, որի հետևանքով հայաթափ էր լինում սրբազան բնօրրանը՝ Արևմտյան Հայաստանը: Խրիմյանը հռչակեց, որ ճշմարիտ հայրենասիրությունը «բուն հայրենեաց երկրին մէջ բնակուիլն է»: Նա կոչ էր անում հայորդիներին՝ վերադառնալ և շենացնել հայրենիքը՝ նախնիներից ժառանգության ստացած «փշալից դաշտերը»՝ գերադասելով օտարության «ծաղկալից բուրաստամներին»:

Թեև Խրիմյանի կաթողիկոսության շրջանը սպառնալիքներով ու վտանգներով առնչվում մի ժամանակաշրջան էր, այնուամենայնիվ, շրջահայաց ու հեռատես Հայրիկը կարողացավ բարեհաջող առաջնորդել ժողովրդին, նույնիսկ ժամանակ գտավ վերակառուցման, բարեկարգման ու գրական-ստեղծագործական գործունեությամբ զբաղվելու և մնալուն գործեր կյանքի կոչելու համար: Սկրտիչ Ա

Վանեցին թողել է հարուստ գրական ժառանգություն, ուր առանձնահատուկ տեղ են գրավում գեղարվեստական, կրոնափիլիսոփայական, բարոյախրատական, մանկավարժական բնույթի ստեղծագործությունները: Խրիմյան Հայրիկի հեղինակած գործերը մեր ազգային-հոգևոր գանձարանի ոսկե ֆոնդի խիստ ինքնատիպ, արժեքավոր մեկ բույն են կազմում: Դրանք են. «Հրաւիրակ Արարատեան» (Կ. Պոլիս, 1850 թ.), «Հրաւիրակ երկրին Աւետեաց» (Կ. Պոլիս, 1851 թ.), «Մարգարիտ արքայութեան երկնից» (Կ. Պոլիս, 1866 թ.), «Յիսուսի վերջին շաբաթ և խաչի ճառ» (Կ. Պոլիս, 1876 թ.), «Ժամանակ և խորհուրդ իւր» (Կ. Պոլիս, 1876 թ.), «Վանգոյժ» (Կ. Պոլիս, 1877 թ.), «Հայգոյժ» (Կ. Պոլիս, 1871 թ.), «Թագաւորաց ժողով» (Էջմիածին, 1909 թ.), «Դրախտի ընտանիք» (Կ. Պոլիս, 1876 թ.), «Սիրաք և Սամուէլ» (Կ. Պոլիս, 1878 թ.), «Պապիկ և թոռնիկ» (Էջմիածին, 1894 թ.) և այլն:


Խրիմյան Հայրիկը մեծ է առաջին հերթին իր բարոյական նկարագրով, պարզ ու շիտակ, արդարամիտ, ժողովրդասեր ու հայրենամկեր էութամբ: Ուղենիշ ունենալով «ամեն ինչ ժողովրդի համար և ժողովրդի տեսակետով» մշտնաբանը՝ նա արժանիորեն վաստակեց համայն հայության կողմից պաշտելի, լուսապսակով զարդարված գործչի համբավ և «Հայոց Հայրիկ» պատվատիտղոսը: Հարազատ ժողովրդի ճակատագրով մտահոգված՝ նա նույնիսկ կյանքի վերջին օրերին չէր դադարում «Ես եմ հովիւն քաջ» լինելուց և իր պարտքը կատարելուց: Սեփական ժողովրդի վիշտ ու ցավով ապրող, նրա ճակատագրով տառապող Ամենայն Հայոց Հայրիկն իր հոգաբարձի ու վշտակոծ հոգին ավանդեց 1907 թ. հոկտեմբերի 29-ին: Որբացավ հայ ժողովուրդը՝ կորցնելով իր պաշտելի Հայոց Հայրիկին: Նրա սրբավայել մարմինն ամփոփված է Մայր Տաճարի զանգակատան հարավարևմտյան կողմում: Հայոց Հայրիկի շիրիմը դարձել ու այսօր էլ շարունակում է ուխտավայր մնալ յուրաքանչյուր հայրենասեր հայորդու համար: Թող Խրիմյան Հայրիկի անմահ ոգին, ուսանելի պատգամները, խրատական խոսքն ու կտակը միշտ և համապագ լինեն մեր սրտերում՝ իբրև ուղենիշ և առիթավառ անցկում, ազատատենչ ոգու, բարի կամքի, ճշմարիտ քրիստոնյայի, մաքրամաքուր հավատի և հայրենիքին անմնացորդ նվիրումի:

Հայոց Հայրիկի մասին շատ է խոսվել ու գրվել, նրա բովանդակալից, փոթորկահույզ կյանքի ու գործի, մարդկային կերպարի մասին հյուսվել են երգեր ու լեգենդներ, գրվել հուշագրություններ ու պատումներ, կատակներ ու սրամտություններ:

Ամենայն Հայոց Հայրիկը Ամենայն Հայոց Բանաստեղծի անգուլակական մտերիմներից էր, որին նվիրել է գեղարվեստական չորս ստեղծագործություն՝ «Հայ ուխտավորին» (1893 թ.), «Կաղնի» (1896 թ.) բանաստեղծությունները և «Երկու հայր», «Խրիմյան Հայրիկի օրերից միմը» (1907) արձակ երկերը, որոնք գրվել են Խրիմյանի մահվան առիթով: «Հայ ուխտավորին» բանաստեղծությունը թուրմանյանը գրել է Սկրտիչ Խրիմյանի՝ 1893 թ. սեպտեմբերի 26-ին կաթողիկոս օծվելու առիթով: Բանաստեղծության մեջ երիտասարդ թուրմանյանը շատ-շատերի մասն արտահայտել է իր բաղձանքներն ու հույսերը, որոնք կապել է ազգընտիր Հայրիկի՝ Ամենայն Հայոց Կաթողիկոս դառնալու հետ.

*Գնա՛ս բարով, այ՛ ուխտավոր,
Երանի՛ քեզ, հայ՛ ուխտավոր,
Որ կարոտով ու սիրառատ
Ուխտ ես գնում դեպ Արարատ....*

Բանաստեղծության գրության շարժառիթի մասին բանաստեղծի դուստր Նվարդ թուրմանյանը հիշում է հոր հետևյալ խոսքերը. «Հայ ուխտավորին» էքսպրոմտ է: Խրիմյանի ընտրության առթիվ չորս հոգի քեֆ սարեցնիք Օրթաճալայում, էն քեֆին գրեցի» (տես Ն. Թուրմանյան, Հուշեր և զրույցներ, էջ 240): Թուրմանյանի համակրանքն ու գնահատանքը Խրիմյանի Հայրիկի՝ որպես ազգային, քաղաքական ու հասարակական գործ-



չի և Հայոց հոգևոր առաջնորդի նկատմամբ անփոփոխ մնացին մինչև վերջ: Նույն բանաստեղծության մեկ այլ տարբերակում կան Հայոց Հայրիկին նվիրված այսպիսի տողեր.

*....Սիրուն է տեսքն է՛ն լըճակին,
Տաճարը սուրբ, լյառն ահագին,
Բայց ավելի մեծ ու շքեղ
Արծիվ հայրիկ ունենք է՛նտեղ,
Երեմակահեր և հոգեհուր,
Հսկայատիպ կանգնած ամուր,
Ինչպես կաղնին Լիբանանի,
Որ հողմերին ծաղր կանի,
Է՛նտեղ արթուն կանգնել է՛ նա
Լուսավորչի շիրմի վրա,
Բազուկն հպարտ հենել կողքին,
Կանգնել է՛ մեծ ու ահագին,
Ու արծիվի աչքերն հրնոց
Սկենել է՛ կողմերն Հայոց,
Կողմերն Հայոց ու շատ հեռուն,
Դիտե՛ք ցրված իր ձագերուն....*

Խրիմյան Հայրիկին ձոնված թուրմանյանի հաջորդ բանաստեղծությունը «Կաղնի»-ն է: Կաղնու այլաբանական պատկերով բանաստեղծն իր դրվատանքն է արտահայտել Խրիմյան Կաթողիկոսի նկատմամբ: Բանաստեղծությունը մակագրված է պոետի մտերիմ բարեկամ իշխանուհի Մարիամ Թուրմանյանին.

*Անտառի միջին բարձրանում էր մի
Հաստաբուն հսկա — ծերունի կաղնի:
Երկինքը բոցոտ շանթ ու կայծակով
Այրել էր նրա բունը շատ անգամ:
Եվ փոթորիկը յուր սառը զարկով
Չարկում էր անդու, սուլում չարակամ....
Բայց նա միշտ կանգուն, նա միշտ աննկուն
Հուսով նայում էր ամպած երկնքին....*

Հ. Թուրմանյանը 1895 թ. նոյեմբերին Սկրտիչ Խրիմյանի հետ անձամբ ծանոթացավ և առավել բարձր գնահատեց Հայոց Հայրիկի ազգային-հասարակական գործունեությունը և մարդկային վեհ նկարագիրը: Հայոց Հայրիկի նկատմամբ Հ. Թուրմանյանի ակնածանքի և առանձնահատուկ վերաբերմունքի վկայություն են մաս «Երկու հայր» և «Խրիմյան Հայրիկի օրերից միմը» արձակ գործերը: Խրիմյանի՝ որպես Ամենայն Հայոց Հայրիկի դիմանկարի պատկերակերտման ուշագրավ հուշ-ակնարկ է «Երկու հայր» ստեղծագործությունը: Համիդյան ջարդերից փրկված, սակայն ամբողջ գերդաստանը կորցրած մի ապաբախտ ու վշտալի քահանա գալիս է Ամենայն Հայոց Կաթողիկոսի մոտ՝ իր վիշտը հայտնելու. կոտորածների ժամանակ նա կորցրել էր հարազատներին՝ 20 հոգու: Հայրիկը ծով համբերությամբ լսում է նրան, ապա ասում, որ իր կորցրածը շատ ավելին է՝ ավելի քան 20 հազար: Հայ ժողովրդի բոլոր կորուստները նրանք են, դրան գումարած՝ քահանայի ընտանիքը: Եվ կաթողիկոսը խնդրում է քահանային մոտենալ իրեն, ձեռքը դնել Հայրիկի գլխին ու օրհնել՝ այդ անդառնալի կորստի ցավին դիմանալու. «....— Ես ոչինչ չեմ ուզում, Հայրիկ, ես... այնպես, եկել եմ... եկել եմ... Հայրիկին ասեմ... էլ ոչինչ չեմ ուզում...»

Ու Հայրիկի առջև կանգնած էր մարդը, որ ամեն ինչ կորցրել էր ու ոչինչ չէր ուզում: Երկուսն էլ լուռ էին:

— Քանի՞ որդի կորցրիր, տե՛ր Սարգիս,— գլուխը վեր քաշեց կաթողիկոսը:

— Ամենքը միասին քսան, Հայրիկ:
— Դու քսան որդի ես կորցրել, իսկ ես քսան հազար,— պատասխանեց Հայրիկը,— այդ էլ քսան՝ եղավ քսան հազար ու քսան... Ո՛րն է շատ, տե՛ր Սարգիս... Քահանան ցնցվեց ու լուռ կանգնած էր:

— Ո՛րն վիշտն է մեծ, տե՛ր Սարգիս:
— Հայրիկինը...
— Դե եկ, տե՛ր Սարգիս, մոտ եկ, աջդ դիր գլխիս, աղոթիր, օրհնիր, որ այս վշտին դիմանամ:

Սաավ ու գլուխը խոնարհեց:
Քահանան շտապեց առաջ, աջը դրավ իր Հայրապետի գլխին, սկսավ աղոթք մրմնջալ, ու աչքերը լցվեցին արտասուքով...

Նա օրհնում էր հայոց կաթողիկոսին...

Նրա առջև խոնարհած էր հայոց Հայրիկը...»:

Այս սրտառու գրվածքի ավարտը թեև մի քիչ անսպասելի է, բայց հայոց ողբերգությանը շատ բնորոշ: Պատմվածքի ստեղծման ստույգ թվականը հայտնի չէ: Գրականագետները հավանական են համարում, որ այն գրված լինի մոտավորապես 1907 թվականին՝ Խրիմյան Հայրիկի մահվան առիթով: Ըստ թուրմանյանագետ Արամ Ինժիկյանի՝ գրության հավանական թվականը 1895-ն է՝ նոյեմբերի վերջը կամ դեկտեմբերի սկիզբը, իսկ տեղը՝ Էջմիածինը: Դա այն ժամանակ էր, երբ Թուրմանյանը կատարում էր մի երկար ուղևորություն՝ «Բորժոմ—Ախալցխա—Ախալքալաք, Ալեքսանդրապոլ—Կարս—Ալեքսանդրապոլ—Ղարաբաղիսա—Դիլիջան—Երևան—Էջմիածին ուղեգծով: Այդ ուղևորության ընթացքում էլ հավանաբար Թուրմանյանը կան ակնատես է եղել պատմվող դեպքին, կան լսել ու գրի է առել (տես Ա. Ինժիկյան, Հովհաննես Թուրմանյան: Կյանքը և ստեղծագործության պատմությունը. 1869—1899, Երևան, 1969, էջ 371, 373):

Հ. Թուրմանյանի՝ Խրիմյան Հայրիկին նվիրված հաջորդ գործը «Խրիմյան Հայրիկի օրերից միմը» հուշագրական պատմվածքն է: Այս գործի ստեղծման ստույգ թվականը ևս հայտնի չէ (գրականագետները հավանական են համարում 1907-ը): Խրիմյանի հետ բարեկամական ջերմ հարաբերություններ ունեցած բանաստեղծը Հայրիկի մեկ օրվա (ավելի ճիշտ՝ մի քանի ժամվա) կենսակերպի նկարագրությամբ կերտել է նրա կենդանի դիմանկարը՝ խոսքի՝ իրեն բնորոշ դիպելով ու արտահայտիչ վրձնահարվածներով, սիրով ու հումորայինառն: Պատմվածքում Հայրիկին այցելում են թուրքական հայաջինջ քաղաքականությունից մազապուրծ, ծանր պայմաններում հայտնված, ծայրահեղ թշվառության ու աղքատության շեղ հատած մարդիկ՝ ուսումնարանի աշակերտ, գաղթական կին, ծեր հոգևորական, և Հայոց Հայրիկը անսահման սրտացավությամբ ու ծով համբերությամբ բոլորին լսում է, բոլորի խնդրանքները կատարում, բոլորին օգնում: Թուրմանյանը հրաշալի ըմբռնմամբ է զգացել Հայրիկի խռովահույզ հոգու տվյալանքն ու տառապանքը, որովհետև դա նաև իր ու համայն հայության ցավն ու ողբերգությունն էր: Նրանք երկուսն էլ վեր էին անձնական ցավից, երկուսի սրտում հայոց անհատակ վիշտն էր ծփում, երկուսը մաս զվարձալի դեպքեր էին պատմում և այնպես սրտալի ծիծաղում, որ միայն իրենք կարող էին. «Խրիմյան Հայրիկը Թիֆլիս գտնված ժամանակ մի օր կանչել էր սովորական մեծ գրույց անելու թե իր գրած ոտանավորները կարդալու: Պետք է ասեմ, որ շատ էր սիրում ոտանավոր» գրելը և իրեն մշտնավոր բանաստեղծ էր համարում:

— Գիշերները քունս չի տաներ,— ասում էր,— սենյակում կշրջեմ, կծխեմ ու կգրեմ:

Շարունակելի

Մայր Տաճարի զանգակատան ներքո ամփոփված երկու հայրապետները

← էջ 2

Հարգանքով դիմելով պապին՝ նա լրջորեն քննադատում է լատին քարոզիչների արածը՝ առաջարկելով. «....նոցա թուղթ առաքեալի ձեռն մեր, և մեք ցուցցուք պատրոցն, թերևս կասեսցին յատելութենէ քրիստոնէից» (Ազգապատում, հտ. Բ, սիւնակ 3205): Նամակում միաժամանակ գրում է որ պապին վայելէ, որ «զՅայս հերետիկոս դատապարտես», քանի որ «սրբազան անուան տեառնդ ոչ է վայելուչ այնպիսի իրականութիւն»:

Ալեքսանդր Հայրապետն իր օրհնությունն է բերել հայ ազատագրական պայքարի մեծ նվիրյալ Իսրայել Օրուն: 1709 թ. Օրին Սուրբ Էջմիածնում հանդիպում է Ալեքսանդր Կաթողիկոսի հետ և ներկայացնում իր ծրագիրը: Հայոց Հայրապետը հավանություն է տալիս նրա ձեռնարկներին, ինչից հետո վերջինս շարունակում է իր ճանապարհը: Իսրայել Օրին իր հետ վերցրել էր նաև Ալեքսանդր Կաթողիկոսի օրհնության գիրը՝ ուղղված Ռուսաց Պետրոս Առաջին ցարին: Գրության մեջ հայրապետն իր օրհնությունն ու բարեմաղթանքներն է ուղղում. «Շնորհագեղուն և աստվածապարզ օրհնությունից հետո, սիրառիթ այս մամակով թող հայտնի լինի Ձեզ՝ վերոգրյալ Պետրոս Ալեքսեևիչի, որ մեր այս սիրելի որդին՝ Իսրայել անուոմով դեսպանը, հանդիպեց սուրբ քրիստոսաւէջ աթոռը: Մենք նրան սիրով և մեծ ուրախությամբ ընդունեցինք ու չափից ավելի սեր և ընդունելություն ցույց տվեցինք: Նա ամենայն մանրամասնությամբ պատմեց մեզ հրամանոցդ որպետությունը և մեր ժողովրդի նկատմամբ ունեցած սերը» (Ա. Արախամյան, Իսրայել Օրի, Երևան, 1978, էջ 111):

Ալեքսանդր Ա Հայրապետը թողել է նաև հարուստ մատենագրական ժառանգություն: Ինչպես Մաղաքիա արք. Օրմանյանն է գրում, «Ալեքսանդր թէ՛ հնուտ անձ մը եղած է և թէ՛ բուռն պաշտման հայադաւան ուղղափառութեան» (Ազգապատում, հտ. Բ, սիւնակ 3184): Նա եղել է հայադավան ուղղափառության ջերմ ջատագով. սրա վառ ապացույցն է նրա «Գիրք ատենական, որ ասի վիճաբանական» աշխատությունը, որը գրել է 1682 թ. (լույս է տեսել 1687 թ. Նոր Զուղայում): Գիրքն ունի հինգ գլուխ, որտեղ հերքվում է քաղեկեղծականության առաջ բերած երկբնության խնդիրը, և պաշտպանվում՝ Հայ Եկեղեցու վարդապետությունը: Նրա գրչին է պատկանում նաև «Աղոթամատույց» գրքուկը, որ լույս է ընծայվել ավելի ուշ՝ 1790 թվականին: Այս երկուն ներկայաց-



ված է Սուրբ Պատարագի իրերի և արարողությունների մեկնությունը:

Ալեքսանդր Ա Զուղայեցին վախճանվել է 1714 թ. նոյեմբերի 22-ին՝ կաթողիկոսական գահակալության ութերորդ տարում: Երանաշնորհ Հայրապետի մարմինն ամփոփվեց զանգակատան ներքնահարկում՝ Մայր Տաճարի գլխավոր մուտքի հյուսիսային կողմում: Երանաշնորհի Հայրապետի գերեզմանի մարմարյա սալին հետևյալ տապանագիրն է. «Վախճանեցաւ Տէր Աղեքսանդր Կաթողիկոս Ամենայն Հայոց և եղաւ յայսմ դամբարանի.... յիշել զձեզ աղաչէ, ով հանդիպողոք բարի, նոյեմբերի ԻԲ/22» (Արսեն Հարությունյան, Վաղարշապատ, Ս. Էջմիածին, 2016, էջ 126):

* * *

Մինաս Ա Ակնեցի Կաթողիկոսի (1751—1753) մահվանից հետո Հայոց հայրապետական գահի թեկնածուներից էր Կ. Պոլսի պատրիարք Հակոբ Նալբանդ, սակայն վերջինս մերժում է կաթողիկոսական գահակալի առաջարկությունը: Մյուս թեկնածուներն էին Ալեքսանդր Քարաբաշը և Սահակ Ահագինը: 1753 թ. հունիսի 22-ին Կ. Պոլսում տեղի ունեցած ժողովի ընթացքում, Ամենայն Հայոց Կաթողիկոս է ընտրվում Ալեքսանդր Քարաբաշը: Նորընտիր հայրապետը 1753 թ. հոկտեմբերին 14-ից դուրս է գալիս Կ. Պոլսից և միայն 1754 թ. մարտի սկզբին հասնում Մայր Աթոռ Սուրբ Էջմիածին: Հասնելուց մի քանի օր անց՝ մարտի 7-ին՝ Տնտեսի կիրակիի օրը, ստանում է կաթողիկոսական



օծում: Նրա՝ կաթողիկոս ընտրվելու և օծվելու մասին կարդում ենք իր իսկ գրած հիշատակարանում. «Թուին ՌՄԲ / 1753 յունիսի, ԻԲ/22 ի Պոլիս մեծ քաղաքն որ կոչի Ըստամպոյ բազմամարդ եկեղեցի Սուրբ Աստուածածին ուր Պատրիարքարանն է կոչեցին զիս նուաստս իբրու լինել Ամենայն Հայոց կաթողիկոս բոլոր իշխանքն և ժողովողոք... յաւուր տնտեսի կիւրակէին օծեցին զանարժանս Կաթողիկոս Ամենայն Հայոց և տնտես ազգիս արամեան» (Դիւան Հայոց պատմութեան, Գիրք Գ, Թիֆլիս, 1894, էջ 2):

Ալեքսանդր Բ Կաթողիկոսի մասին տեղեկությունները ևս խիստ սակավ են: Ծնվել է Կ. Պոլսում: Մինչև կաթողիկոս օծվել՝ հիշվում է որպես նվիրակ Եղովկիայում: Վերջինս Աբրահամ Գ Կրետացի Կաթողիկոսի օրոք եղել է աթոռակալ: Մանկությունից ծառայել է Մայր Աթոռ Սուրբ Էջմիածնում, սակայն Պետրոս վարդապետ Քյուրքուրի հետ Ղազար Ա Զահեկեցի Կաթողիկոսի կողմից հալածանքների է ենթարկվել և հաստատվել Կ. Պոլսում՝ իր ծերության օրերը հանդարտ անցկացնելու համար: Սակայն հակառակ իր պատկառելի տարիքին և ցանկությանը ընտրվում է Ամենայն Հայոց Կաթողիկոս:

Միմեռն երևանցի Կաթողիկոսը նրա մասին հիշատակում է. «....որ էր այր հեզաբարոյ և պարզամիտ և բազմաշխատ, որդի և բնիկ Սրբոյ Աթոռոյս»: Եվ ունի զբարերարութիւնս բազունս ի Սուրբ Աթոռս ի մանկութենէ (Զամբռ, էջ 75): Մաղաքիա արք. Օրմանյանը ևս գնահատանքով նշում է.

«....և եթէ տարիքին պատճառաւ հմար չէր իրնէ երկարատև և բազմարդին պաշտօնավարութիւն սպասել, զոնէ կաթողիկոսական աստիճանը արդար վարձատրութիւն էր իր նախկին արդիւնաւորութեանց, և կրած տառապանաց ու տանջանաց»:

Ալեքսանդր Բ Բյուզանդացի Կաթողիկոսն ունեցել է Քարաբաշ մականունը: Այս մականունն ամենայն հավանականությամբ ստացել է սև, թավ հոնքեր ունենալու կամ էլ չարքաշ, տաժանակիր կյանքով ապրելու պատճառով, թեպետ կա նաև կարծիք, ըստ որի՝ գերդաստանի անունն է, քանի որ Կ. Պոլսում Կարապետ Քարաբաշյան անունով բանասերն իրեն Ալեքսանդր Բ Կաթողիկոսի ցեղից է համարել (Մանվել սրկ. Սարգսյան, Հայ հոգևորականների պատվանունների և մականունների բացատրական բառարան, Ս. Էջմիածին, 2018, էջ 63):

Ծերունագարդ հայրապետը վախճանվեց 1755 թ. նոյեմբերի 11-ին՝ Հրեշտակապետաց տոնի օրը՝ աթոռակալելով ընդամենը մեկ ու կես տարի: Նրա մարմինն ամփոփված է զանգակատան ներքնահարկում՝ Մայր Տաճարի գլխավոր մուտքի հարավային կողմում: Երանաշնորհի հայրապետի գերեզմանի մարմարյա սալին հետևյալ չափածո տապանագիրն է. «Քրիստոս Որդի Հօր Միածին դատող բնութեանս մեր մարդկային յորժամ փառօք գայցես կըրկին, յիշեա ողորմութեամբ քոյին զՀայրապետս մեր գիողեկին, զՏէր Աղեքսանդր Բիւզանդացին, արժանացո սրբոց զընդին, յարքայութիւնդ մոյծ երկնային, որ արդ հանգեաւ ըստ Քում բանին, աստէն եղաւ մարմին մորին, հազար և յերկերիւր յամին, չորրորդ ևս ընդ սըմա բարդին, նոյեմբերի մետասանին» (Արսեն Հարությունյան, Վաղարշապատ, Ս. Էջմիածին, 2016, էջ 125—126):

Մաղաքիա արք. Օրմանյանն իր «Ազգապատում» աշխատության մեջ հիշատակում է, որ 1888 թ. մայիսին Սուրբ Էջմիածնի ներքին բակում շինարարական աշխատանքներ կատարելու ժամանակ անհրաժեշտություն առաջացավ Ալեքսանդր հայրապետների գերեզմաններն ավելի խորն իջեցնելու: Սակար Ա Թեղուտցի Կաթողիկոսի հրամանով նա Ներսես եպիսկոպոս Խուրավերդյանի և Մամբրե եպիսկոպոս Սանասարյանի հետ մասնակցել է «անոնց ոսկորներուն օրինաւոր գետեղման և շիրիմներուն կանոնաւորապէս փակուելուն» (Ազգապատում, հտ. Բ, սիւնակ 3452):

Մարիամ ՀԱՐՈՒԹՅՈՒՆՅԱՆ
Արամայիս սրկ. ԱԶԻՉՅԱՆ

Հանգիստը որպես հոգևոր կյանքի անբաժան մաս

← էջ 6

Այս օրերը հիշեցումն է նրա, որ ամեն ինչ, որ մեզ Աստված տալիս է անգամ մեր աշխատանքի միջոցով, էությանը պատկանում է ոչ թե մեզ, այլ Աստծուն, իսկ մենք ընդամենը մշակներ ենք, որ ժամանակավորապես պատասխանատու ենք այդ ողջ նյութական բարիքների տնօրինման համար: Աշխատանքը ոչ թե ինքնանպատակ սկզբունք է, այլ միջոց՝ Աստծուն փառավորելու, Նրա արարչագործությունը շարունակելու:

Մեր օրերում հսկայական աճ են գրանցել հնարավորությունները, որոնց շնորհիվ մարդիկ կարող են աշխատել, արարել, ինքնահաստատվել որևէ ոլորտում: Աշխատանքն այսօր դարձել է մի կողմից՝ նյութապես ապահովված լինելու, աղքատությունից խուսափելու և բարեկեցիկ կյանք կառուցելու միջոց, մյուս կողմից՝ սեփական հնարավորությունները բացահայտելու, իրացնելու և զարգանալու հրաշալի գրավական: Սակայն այս ամենն ունի իր մութ կողմը ևս: Տեղեկատվական դաշտում՝ հատկապես համացանցային սոցիալականություն, գերակա դիրք է զբաղեցնում այն տեղեկությունը, որը քարոզում է աշխարհիկ հաջողակության, անհատական ձեռքբերումների՝ միմիայն նյութականացված գաղափարները: Համատարած սպառողական մշակույթի պատճառով հասարակության անդամների շրջանում արմատացել է անհատական նվաճումները, նյութական հնարավորությունները ի ցույց դնելու, դրանով կարծես ինքնագոհ դառնա-

լու ցանկությունը: Աշխատանքն ու նյութական բարիքների սպառումն այդպիսով դառնում են ինքնանպատակ. այնտեղ տեղ չունի անձի հոգևոր աճը, այնտեղ չկա այն զգացումը, որ այս ամենը պատկանում է ոչ թե մեզ, այլ Աստծուն: Աշխատանքը կուռք դարձնելը վտանգում է ոչ միայն հոգևոր կյանքը, այլև ֆիզիկական գերբեռնվածություն է առաջ բերում, որի հետևանքով մարդիկ ավելի քիչ են բավարարված լինում իրենց կյանքից, ավելի շատ են աշխատում և ավելի պակաս վայելում: Սրան գումարած՝ գերծանրաբեռնվածությունը գերծ չէ մարմնական առողջությանը հասցնող վնասներից: Այս ամենն արդեն խորթ են քրիստոնեական արժեհամակարգին, աշխատանքի ու նյութական միջոցների քրիստոնեական ընկալմանը:

Հիսուս Քրիստոս գեղեցիկ համեմատությամբ մեզ ուսուցանում է՝ կյանքի առաջնային նպատակ չդարձնել միմիայն աշխատանքն ու առօրյա հոգսերի բավարարումը. «Նայեցեք երկնքի թռչուններին. ոչ վարում են, ոչ հնձում և ոչ էլ շտեմարանների մեջ հավաքում. և ձեր երկնավոր Հայրը կերակրում է նրանց. չէ՞ որ դուք ավելի եք, քան նրանք» (Մատթ. 6:26): Քրիստոնյայի աշխատանքը և ընդհանրապես առօրյա հոգսերը պետք է լցված լինեն Աստծո հանդեպ հույսով ու հավատով, իսկ կյանքի կենտրոնը պետք է լինի Քրիստոս և ոչ այս աշխարհն ու իր բարիքները:

Այս ամենը ևս մեկ անգամ զգաստության, մեր ապրած կյանքին կողմնակի հա-

յացք ձգելու և մեր առօրյան վերաթևորելու կոչ է մեզ: Քրիստոնյայի կյանքի կարևորագույն սկզբունքը կյանքն ամբողջովին որպես Աստծո պարզ և ընդունելն է, այլ ոչ թե կյանքը բաժանել երկու ժամանակահատվածի միջև՝ ժամանակ, երբ աշխատում ենք, և ժամանակ, երբ հանգստանում կամ վայելում ենք: Աշխատել՝ հանգստանալով, և հանգստանալ՝ աշխատելով. այս միջոցով է, որ կյանքում կարող ենք ապահովել հավասարակշռություն և ներդաշնակություն նյութականի ու հոգևորի, հոգսերի ու բավականության միջև:

Հանգստի իրավունքն աստվածատուր շնորհ է: Ի վերջո, մենք բոլորս ծնվում և ապրում ենք տարատեսակ հոգսերով բեռնավորված անհանգիստ աշխարհում, և մեր հոգին, որ Աստծո պատկերն է կրում իր մեջ, ձգտում է հանգստի առ Աստված: Օգոստինոս Երանելին գրում է. «Մեր սրտերն անհանգիստ են, մինչև որ հանգիստ չեն առնում Աստծով»: Այսպիսով՝ առօրյայից, կենցաղից, աշխատանքից ուշադրությունը որոշ ժամանակով կտրելը և լիովին առ ներաշխարհ, առ Աստված դառնալը կարևորագույն գործողություն է քրիստոնյայի հոգևոր կյանքի համար: Մեր եկեղեցին կոչ է անում կիրակին նվիրել Աստծուն՝ Սուրբ Պատարագին հաղորդակցությամբ, Աստծո խոսքի ունկնդրությամբ և աղոթքով անցկացնելով: Վերջապես, որպես քրիստոնյաներ՝ կարևոր է մտապահել հետևյալը.

• Աստված Ինքը հանգստանում էր:

• Աստված մեզ ևս պատգամում է հանգստանալ:

• Աշխատանքից հանգիստը Աստծուն և հոգևոր կյանքին ժամանակ տրամադրելու համար անհրաժեշտ նախապայման է:

Այս սկզբունքների որդեգրումը աշխատանք—հանգիստ հավասարակշռության պահպանման լավագույն տարբերակն է բոլորիս համար:

Էդվարդ սրկ. ԲԵՇԻՇՅԱՆ
Սոնա ԲԵՇԻՇՅԱՆ

ՔՐԻՍՏՈՆՅԱ ՀԱՅԱՍՏԱՆ

Կրոնական, մշակութային,
լրատվական երկշաբաթաթերթ

Հիմնադիր՝ Մայր Աթոռ Սուրբ Էջմիածին
Հրատարակիչ՝ «Քրիստոնյա Հայաստան»
թերթի խմբագրություն

Գլխավոր խմբագիր՝
Նարինե Հովհաննիսյան

Գրանցման վկայական՝ 624
Խմբագրության հասցեն՝

Մայր Աթոռ Սուրբ Էջմիածին
Հեռախոս՝ (010) 517 280

Էլ. փոստ՝ qristonyahayastan1@gmail.com
qristhay@etchmiadzin.am

web կայք՝

krishayas.wordpress.com
etchmiadzinlibrary.am/en/kristonya-hayastan

Ստոր. տպագր. 14.11.2025 թ.
Տպաքանակը՝ 1265